


元史



本紀卷第六

元史六

南京國子監祭酒侯恪

司業謝德溥補修

世祖三

二年春正月辛未朔日有食之癸酉山東廉訪使言

真定路總管張宏前在濟南乘變盜用官物詔以宏

嘗告李壇反免宏死罪罷其職徵贓物償官邳州萬

戶張邦直等違制販馬並處死敕徙鎮海百里八謙

謙州諸色匠戶於中都給銀萬五千兩為行費又徙

奴懷忒木帶兒斫手人匠八百名赴中都造船運糧

兩相侯謝補修
已卯北京路行省給札刺赤戶東徒行糧萬石以鄧
州監戰訥懷新舊軍萬戶董文炳並爲河南副統軍
甲申詔申嚴越界販馬之禁違者處死乙酉以河南
北荒田分給蒙古軍耕種戊子諸王塔察兒使臣濶
濶出至北京花道驛手殺驛吏郝用郭和尚有旨徵
鈔十定給其主贖死庚寅城西番匣答路癸巳八東
乞兒部牙西來朝貢銀鼠皮二千賜金素幣各九帛
十有八武城縣王氏妻崔一產三男丁酉給親王玉
龍答失部民糧二千石尚麗國王王植遣其弟公均
奉表來貢二月辛丑朔元帥按東與宋兵戰于釣魚

山敗之獲戰艦百四十六艘甲辰初立宮闈局戊申
賜親王兀魯帶河間王印給所部米千石丁巳車駕
幸上都癸亥并六部爲四以麥木丁爲吏禮部尚書
馬亨戶部尚書嚴志範兵刑部尚書別魯丁工部尚
書禁山東東路私煎硝鹽甲子以蒙古人充各路達
魯花赤漢人充總管回回人充同知永爲定制以同
知東平路宣慰使寶合丁爲平章政事山東廉訪使
王晉爲叅知政事廉希憲商挺罷詔併諸王只必帖
木兒所設管民官屬詔諭總統所僧人通五大部經
者爲中選以有德業者爲州郡僧錄判正副都綱等

兩廡侯倪補修
官仍於各路設三學講三禪會三月癸酉骨鬼國人
襲殺吉里迷部兵敕以官粟及弓甲給之丁亥敕邊
軍習水戰屯田誅宋謀李富住乙未罷南北互市括
民間南貨官給其直遼東饑發粟萬石鈔百定賑之
夏四月戊午賜諸王合必赤亦怯烈金素弊各四拜
行金弊一五月壬午賞萬戶晃里荅兒所部征吐蕃
功銀四百五十兩戊子禁北京平灤等處人捕獵庚
寅令軍中犯法不得擅自誅戮罪輕斷遣重者聞奏
勅上都商稅酒醋諸課毋徵其權塩仍舊諸人自願
徙居永業者復其家詔西川山東一京等路戍邊軍

屯田閏五月癸卯升齊縣爲景州辛亥檢覈諸王元
魯帶部民貧無孳畜者三萬七百二十四人人月給
米二斗五升四閱月而止丙辰雅州碉門宣撫使請
復碉門城邑詔相度之癸亥移秦蜀行省於興元丙
寅命四川行院分兵屯田丁卯分四親王南京屬州
鄭州隸合丹鈞州隸明里雅州隸孛羅赤蔡州隸海
都他屬縣復還朝廷以平章政事趙璧行省于南京
河南府大名順德洛磁彰德懷孟等路平章政事府
希憲行省事于東平濟南益都淄萊等路中書左丞
姚樞行省事于西京平陽太原等路詔諸路州府若

自古名郡戶數繁庶且當衝要者不須改併其戶不滿千者可併則併之各投下者併入所隸州城其散府州郡戶少者不須更設錄事司及司候司附郭縣止令州府官兼領括諸路木占籍戶任差職者以聞六月戊申朔新得州安撫向良言頃以全城內附元領軍民流散南界者多欲歸順金乞招徠從之又敕良以所領新降軍民移戍通江縣行新得州事辛未賜阿朮所部馬價鈔一千三十三錠有奇丙子太陰犯心大星戊寅移山東統軍司於沂州萬戶重喜立十字路復正陽命禿剌戍之己卯以淇州隸懷孟路高

麗國王王植遣其臣榮胤宿奉表來賀聖誕節千戶濶濶出部民乏食賜鈔賑之王晉罷樞密院臣言各路出征逃亡漢軍及貧難未起戶并投下隱匿事故者宜一槩發遣應役從之敕行院及諸軍將校卒伍須正身應役違者罪之秋七月辛酉益都大蝗饑命減價糶官粟以賑癸亥安南國王陳光昞遣使奉表來貢甲子詔賜光昞至元三年曆八月丙子濟南路鄒平縣進芝草一本戊寅高麗國王王植遣使來貢方物己卯諸宰職皆罷以安童爲中書右丞相伯顏爲中書左丞相戊子召許獨於懷孟楊誠於益都車

兩廂侯補修
駕至自上都九月戊戌以將有事太廟取大樂工於
東平預習儀禮敕江淮沿邊樹柵徐宿邳三州助役
使庚子皇孫鐵穆爾生丁巳賞諸王只必帖木兒麾
下河西戰功銀二百五十兩冬十月巳卯享于太廟
癸未敕順天張柔東平嚴忠濟河間馬總管濟南張
林太原石抹總管等戶改隸民籍統軍抄不花萬戶
懷都麾下軍士所俘宋人九十三口官贖爲民其私
越禁界掠獲者四十五人許令親屬完聚並種田內
地戊子詔隨路私商曾入南界者首實免罪充軍十
一月丙申召李昶於東平辛丑賜諸王只必帖木兒

銀二萬五千兩鈔千錠癸丑賞楊文安戰功金五十
兩所部軍銀六百兩及幣帛有差甲子詔事故貧難
軍不堪應役者以兩戶或三戶合併正軍一名其丁
單力備者許顧人應役十二月巳巳省併州縣凡二
百二十餘所庚午宋子貞言朝省之政不省數行數
改又刑部所掌事于人命尚書嚴忠範年少宜選老
於刑名者爲之又請罷北京行中書省別立宣慰司
以控制東北州郡並從之禁朝省告許以息爭訟辛
未以諸王也速不花所部戍西蕃軍屢有戰功賞銀
三百兩癸酉召張德輝於真定徒單公履於衛州丁

丑詔諭高麗賜至元三年曆日癸未賜劉秉忠金五十兩甲申賜伯顏宋子貞楊誠銀千兩鈔六十錠丁亥敕選諸翼軍富強才勇者萬人充侍衛親軍己丑瀆山大王海成敕置廣寒殿是歲戶一百五十九萬七千六百一絲九十八萬六千二百八十八斤包銀鈔五萬七千六百八十二錠賜諸王金銀幣帛如歲例彰德大名南京河南府濟南淄萊太原弘州霍西京北京益都真定東平順德河間徐宿邳蝗旱太原霜災斷死罪四十二人

三年春正月乙未高麗國王王植遣使來賀丙午命

朶端趙璧持詔撫諭四川將吏軍民壬子立制國用使司以阿合馬爲使癸丑選女直軍二千爲侍衛軍四川行樞密院謀取嘉定請益兵命朶端趙璧摘諸翼蒙古漢軍六千人付之二月丙寅廉希憲宋子貞爲平章政事張文謙復爲中書左丞史天澤爲樞密副使癸酉立瀋州以處高麗降民壬午平陽路僧官以妖言惑衆伏誅以中書右丞張易同知制國用使司事叅知政事張惠爲制國用副使癸未車駕幸上都甲申罷西夏行省立宣慰司初製太常禮樂工寇服立東京廣寧懿州開元恤品合懶婆娑等路宣撫

司乙酉蠲中都今年包銀四分之一詔理斷阿木部下所俘人口畜牧及其草地爲民侵種者以制國用使司條畫論中外官吏三月辛巳分衛輝路爲親王玉龍答失分地戊戌賑水達達民戶饑巳未王晉及侍中和哲斯濟南益都轉運使王明以隱匿鹽課皆伏誅夏四月丁卯五山珎御榻成置瓊華島廣寒殿亳州水軍千戶胡延等領騎兵渡淝水逾荆山與宋兵戰殺獲甚衆賞鈔幣有差庚午敕僧道祈福於中都寺觀詔以僧機爲總統居慶壽寺巳卯申嚴瀕海鹽之禁敕宮燭毋彩繪五月乙未遣使諸路慮囚

庚子敕太醫院領諸路醫戶惠民藥局辛丑以黃金飾渾天儀丙午浚西夏中興漢延唐來等渠比良田爲僧所據者聽蒙古人分墾丙辰罷益都行省蠲平灤益都質子戶賦稅之半六月丁卯封皇于南木合爲北于王以印給之辛未徙歸化民於清州興濟縣屯田官給牛具壬申賜劉整畿內地五十頃癸酉以千戶札刺兒沒于王事賜其妻銀二百五十兩丙子立漕運司戊寅以陝西行省平章賽典赤等政事修治賜銀五千兩命山東統軍副使王仲仁督造戰船于汴申嚴陝西河南竹禁立拱衛司秋七月丙申罷

息州安撫司壬寅詔上都路總督府遇車駕巡幸行
畱守司事車駕還卽復舊丙午遣使祠五嶽四瀆甲
寅添內外巡兵外路每百戶選中產者一人充之其
賦令餘戶代輸在都增武衛軍四百己未以噶代堅
臺四州隸忻州詔令西夏避亂之民還本籍成都新
民爲豪家所庇者皆歸之州縣詔招集逃亡軍限百
日詣所屬陳首原其罪貧者併戶應役八月癸亥賜
丞相伯顏第一區丁卯以兵部侍郎黑的禮部侍郎
殷弘使日本賜書曰皇帝奉書日本國王朕惟自古
小國之君境上相接尚務講信修睦况我祖宗受天

明命奄有區夏遐方異域畏威懷德者不可悉數朕
卽位之初以高麗無辜之民久瘁鋒鏑卽今罷兵還
其疆場反其旄倪高麗君臣感戴來朝義雖君臣而
歡若父子計王之君臣亦已知之高麗朕之東藩也
日本密邇高麗開國以來時通中國至於朕躬而無
一乘之使以通和好尙恐王國知之未審故特遣使
持書布告朕心冀自今以往通問結好以相親睦且
聖人以四海爲家不相通好豈一家之理哉以至用
兵夫孰所好王其圖之又詔高麗導去使至其國戍
子高麗國王王植遣其大將軍朴琪來賀聖誕節阿

木畧地斬黃俘獲以萬計九月戊午車駕至自上都
冬十月庚申朔降德興府爲奉聖州癸亥高麗使還
以王植病詔和藥賜之丁丑徙平陽經籍所于京師
更敕牒舊式太廟成丞相安童伯顏言祖宗世數尊
謚廟號增祀四世各廟神主配享功臣法服祭器等
事皆宜定議命平章政事趙壁等集群臣議定爲八
室申禁京畿畋獵壬午命制國用使司造神臂弓千
張矢六萬十一月辛卯初給京府州縣司官吏俸及
職田戊戌瀕御河立漕倉丁未申嚴殺牛馬之禁宋
子貞致仕辛亥以忽都荅兒爲中書左丞相詔禁天

又圖讖等書丙辰千戶散竹帶以嗜酒失所守大良
平罪當死錄其前功免死令往東川軍前自效詔建
都使復歸朝又詔嘉定等府沿江一帶城堡早降又
詔四川行樞密院遣人告諭江漢庸蜀等效順具官
吏姓名對階換授有功者遷有才者用民無生理者
以衣糧賑之願遷內地者給以田廬毋令失所十二
月庚申給諸王合必赤行軍印辛酉詔改四川行樞
密院爲行中書省以賽典赤也速帶兒等僉行中書
省事甲子立諸路洞冶所以梁成生擒宋總轄官授
同知開州事佩金符減輝州竹課先是官取十之六

元史本紀卷六 九
至是減其二丁亥詔安肅公張柔行工部尚書段天祐等同行工部事修築宮城併太府監入宣徽院仍以宣徽使專領監事詔賜高麗以至元四年曆日仍慰諭之建大安閣于上都鑿金口導盧溝水以漕西山木石赦諸越界私商及謀人與偽造鈔者送京師審覈是歲天下戶一百六十萬九千九百三東平濟南益都平灤真定洛磁順天中都河間北京蝗京兆鳳翔旱斷死罪九十六人賜諸王金銀幣帛如歲例四年春正月甲午陝西行省以開州新得復失請益兵敕平陽延安等處簽民兵三千人山東河南懷孟

潼川調兵七千人益之丁酉申嚴平陽等處私鹽之禁壬寅立茶速忝水十四驛癸卯勅修曲阜宣聖廟乙巳百濟遣其臣梁浩來朝賜以錦繡有差禁僧官侵理民訟辛亥封安肅公張柔爲蔡國公以趙璧爲樞密副使立諸路洞冶都總管府癸丑敕封管木土山爲武定山其神曰武定公泉爲靈淵其神曰靈淵侯僉蒙古軍戶二丁三丁者出一人爲軍四丁五丁者二人六丁七丁者三人乙卯高麗國王王植遣使來朝詔撫慰之戊午立提點宮成所析上都隆興府自爲一路行總管府事立開元等路轉運司城大都

元史本紀卷六
三月庚申粘合南合復平章事阿里復爲中書右丞
丁卯改經籍所爲弘文院以馬天昭知院事丁亥括
西夏民田徵其租車駕幸上都詔陝西行省招諭宋
人又詔嘉定瀘州重慶夔府涪達忠萬及釣魚禮義
大良等處官吏軍民有能率衆來降者優加賞擢三
月己丑復以耶律鑄爲中書左丞相辛卯自潼關至
蘄縣立河渡官八員以察姦僞乙未敕中都路建習
樂堂使樂工隸業其中己亥賜皇子燕王忙阿剌那
沒罕忽哥赤銀三萬兩辛丑夏津縣大雨雹壬寅安
重言比者省官員數平章左丞各一員今丞相五人

素無此例臣等議擬設二丞相臣等蒙古人三員惟
陛下所命詔以安童爲長史天澤次之其餘蒙古漢
人叅用勿令員數過多又詔宜用老成人如姚樞等
一二員同議省事丁巳耶律鑄制官縣樂成詔賜名
大成夏四月甲子新築宮城辛未遣使祀岳瀆五月
丁亥朔日有食之敕上都重建孔子廟乙未應州大
水丙申威州山後大番弄麻等十一族來附賜以璽
書金銀符已酉以捕獵戶達魯花赤僞造銀符處死
壬子敕諸路官吏俸令包銀民戶每四兩增納一兩
以給之丙辰析東平之博州五城別爲一路六月壬

戊以中都順天東平等處蠶災免民戶絲料輕重有
差乙丑復以史天澤爲中書左丞相忽都荅兒耶律
鑄並降平章政事伯顏降中書右丞相廉希憲降中書
左丞阿里張文謙並降叅知政事乙酉賜諸王玉龍
荅失銀五千兩幣三百歲以爲常罷宣徽院黑的殷
弘以高麗使者宋君斐金贊不能導達至日本來奏
降詔責高麗王王植仍令其遣官至彼宣布以必得
要領爲期秋七月丙戌朔敕自中興路至西京之東
勝立水驛十戊戌罷息州安撫岳林以其民隸南京
路罷懷孟路安撫李宗傑以其民隸本路發鞏昌鳳

翔京兆等處未占籍戶一千修治四川山路橋梁棧
道大名路達魯花赤愛魯總管張弘範等盜用官錢
罷之壬寅申嚴京畿牧地之禁甲寅詔亦卽納新附
貧民從人借貸困不能償者官爲償之仍給牛具種
實及糧食簽東京軍于八百人充侍衛軍八月庚申
填星犯天罇辛酉申嚴平灤路私鹽酒醋之禁丙寅
復立宣徽院以院中書右丞相線真爲使丁丑封皇
子忽哥赤爲雲南王賜馳鈕金鍍銀印壬午太白犯
軒轅大星命怯綿征建都高麗國王王植遣其秘書
監郭汝弼來賀聖誕節阿木畧地至襄陽俘生口五

萬馬牛五千宋人進步騎來拒阿木率騎兵敗之九月壬辰作玉殿于廣寒殿中乙未總帥汪良臣請立察於毋章德山控扼江南以當釣魚之街從之戊申以許衡爲國子祭酒安南國王陳光昞遣使來貢優詔荅之立大理等處行六部以闊闊帶爲尚書兼雲南王傳柴禎尚書兼府尉寧源侍郎兼司馬庚戌遣雲南王忽哥赤鎮大理鄯闡茶罕章赤禿哥兒金齒等處詔撫諭吏民又詔諭安南國俾其君長來朝子弟入質編民出軍役納賦稅置達魯花赤統治之癸丑中嚴西夏中興菱路僧尼道士商稅酒醋之禁車

駕至自上都王鶚請立選舉法有旨今議舉行有司難之事遂寢冬十月辛酉制國用司言別怯赤山石絨織爲布火不能然詔采之壬戌賜駙馬不花銀印魚通崑州等處達魯花赤李福招諭西番諸旅酋長以其民入附以阿奴版的哥等爲喝吾等處總管並授璽書及金銀符鐵旗城後番官官折蘭遣其子天郎持先受憲宗璽書金符乞改授新命從之甲子歲星犯軒轅大星辛未太原進嘉禾二本異畝同穎甲戌賑新附民陳忠等鈔丁丑制國用使司請量節經用從之庚辰定品官子孫廕叙格十一月乙酉享于

太廟戊戌立新蔡縣以忽察李家奴統所部兵戌之
甲辰立夔府路總帥府戊開州乙巳填星犯天罇距
星申嚴京畿畋獵之禁南京宣尉劉整赴闕奏攻宋
方畧宜先從事襄陽十二月甲戌賞河南路統軍使
訥懷所部將士戰功銀九千六百五十兩鈔幣鞍勒
有差丙子賑親王移相哥所部饑民丁丑給遼東新
簽軍布六萬匹己卯立遼東路水驛七賞元帥阿朮
部下有功將士二千二十五人銀五萬五千三百兩
金五十兩及錦綵鞍勒有差庚辰僉女直水達達軍
三千人立諸位幹脫總管府省平陽路岳陽和州二

縣入冀氏復置霸州益津縣省安西路櫟陽縣入臨
潼是歲天下戶口一百六十四萬四千三十山東河
南北諸路蝗順天東鹿縣旱免其租斷死罪一百十
四人賜諸王金銀幣帛如歲例

五年春正月甲午太陰犯井庚子上都建城隍廟辛
丑敕陝西五路四川行省造戰艦五百艘付劉整高麗
國王王植遣其弟滄來朝詔以植飾辭見欺面數其
事於滄切責之復遣北京路總管于也孫脫禮部郎
中孟甲持詔往諭令具表遣海陽公金俊侍郎李藏
用與去使同來以聞庚戌賜高麗國新曆閏月戊午

以陳亳穎蔡等處屯田戶充軍令益都漏籍戶四千
淘金登州栖霞縣每戶輸金歲四錢二月戊子太陰
犯天關己丑太陰犯井給河南山東貧乏軍士鈔戊戌
改軍器局爲軍器監辛丑百戶渾都速駐營濟南路屬
縣三年脅取民飲食糧料當粟五千石救杖決之仍
償粟千石析甘州路之肅州自爲一路三月丙寅罷
諸路四品以下子孫入質者田禹妖言救減死流之
遠方禁民間兵器犯者驗多寡定罪甲子救快綿率
兵二千招諭建都壬申改毋章德山爲定遠城武羣
山爲武勝軍丁丑救阿里等詣軍前閱視軍籍罷諸

路女直契丹漢人爲達魯花赤者回回畏兀乃蠻唐
兀人仍舊夏四月壬寅遣使杞嶽瀆五月辛亥朔以
太醫院拱衛司教坊司及尚食尚果尚醞三局隸宣
徽院癸亥都元帥百家奴拔宋嘉定五花石城白馬
三砦癸酉賜諸王禾忽及八刺合幣帛六萬匹六月
辛巳朔濟南王保和以妖言惑衆謀作亂救誅首惡
五人餘勿論甲申中山大雨雹阿木言所領者蒙古
軍若遇山水砦柵非漢軍不可宜令史樞率漢軍協
力征進從之戊申東平等處蝗己酉封諸王習怯吉
爲河平王賜駝針金印秋七月辛亥召翰林直學士

高鳴順州知州劉瑜中都郝謙李天輔韓彥文李祐
趕上都以山東統軍副使王仲仁戊眉州子子詔陝
西統軍司兼領軍民錢穀罷各路奧魯官令管民官
兼領癸丑立御史臺以右丞相塔察兒爲御史大夫
詔諭之曰臺官職在直言朕或有未當其極言無隱
毋憚他人朕當爾主仍以詔諭天下立高州北二驛
戊辰罷西夏宣撫司庚午省諸路打捕鷹坊工匠洞
冶總管府令轉運司兼領之丙子立西夏惠民局高
麗國王王植遣其臣雀東秀來言備兵一萬造船千
隻詔遣都統領脫朶兒性闊之就相視黑山日本道

路仍命耽羅別造船百艘以伺調用詔四川行省集
典赤自利州還京兆立東西二川統軍司以劉整爲
都元帥與都元帥阿朮同議軍事整至軍中議築白
河口鹿門山遣使以聞許之罷軍中諸司叅議八月
乙酉程思彬以投匿名書言斥乘輿伏誅己丑亳州
大水庚子敕京師瀕河立十倉命忙古帶率兵六千
征西番建都九月癸丑中都路水免今年田租罷中
都路和顧所丁巳阿朮統兵圍樊城敕長春宮修設
金籙周天大醮七晝夜建堯廟及后土太寧宮庚申
賜安南國王陳光昞錦綉及其諸臣有差己丑立河

南屯田命兵部侍郎黑的禮部侍郎殷弘齋國書復使日本仍詔高麗國遣人導送期於必達毋致如前稽阻詔諭安南國陳光昞來奏稱占城真臘二寇侵擾已命卿調兵與不干併力征討今復命雲南王忽哥赤統兵南下卿可遵前詔遇有叛亂不庭爲邊寇者發兵一同進討降服者善爲撫綏車駕至自上都益都路飢以米三十萬八千石賑之復以史天澤爲樞密副使冬十月戊寅朔日有食之己卯敕中書省樞密院凡有事與御史臺官同奏立河南等路行中書省以叅知政事阿里行中書省事庚辰以御史

中丞阿里爲叅知政事壬午詔恤沿邊諸軍其橫科差賦責與魯官償之庚寅敕從臣禿忽思等錄毛詩孟子論語乙未享于太廟中書省臣言前代朝廷必有起居注故善政嘉謨不致遺失卽以和禮霍孫獨胡刺充翰林待制兼起居注敕給黎雅嘉定新附民甲戌戌宮城成劉秉忠辭領中書省事許之爲大保如故十一月己酉簽河南山東邊城附籍諸色戶充軍庚申宋兵自襄陽來攻沿山諸寨阿木分諸軍禦之斬獲甚衆立功將士千三百四人詔首立斬功生擒敵軍者各賞銀五十兩其餘賞賚有差癸酉御史

臺臣言立臺數月發擿甚多追理侵欺糧粟近二十萬石錢物稱是有詔褒諭免南京河南兩路來歲修築都城役夫十二月戊寅以中都濟南益都淄萊河間東平南京順天順德真定恩州高唐濟州北京等處大水免今年田租敕二分二至及聖誕卽日祭星于司天臺詔諭四川行省沿邊屯戍軍士逃役者處死復置乾州奉天縣省好時求壽人焉以鳳州隸興元路德興府改奉聖州隸宣德是歲京兆大旱天下戶一百六十五萬二百八十六斷死罪六千九人賜諸王金銀幣帛如歲例

六年春正月癸丑高麗國王王植遣使以誅權臣金佖來告賜曆日西錦立四道按察司戊午阿木軍入宋境至復州德安府荆山等處俘萬人而還庚申以叅知政事楊果為懷孟路總管甲戌益都淄萊大水恩州饑命賑之敕史天澤與樞密副使駙馬忽刺出董師襄陽二月壬戌以立四道提刑按察司詔諭諸道已丑詔以新製蒙古字頒行天下兩申罷宣德府稅課所以上都轉運司兼領改河南懷孟順德三路稅課所為轉運司丁酉簽民兵二萬赴襄陽賑欠州人匠貧乏者米五千九百九十九石敕鞍靴箭鏃等

物自今不得以黃金爲飾開元等路饑減戶賦布二疋秋稅減其半水達達戶減青鼠二其租稅被災者免徵免軍丁貧乏軍士一千九百餘戶爲民癸卯給河南行省鈔千錠犒軍三月甲寅詔益都路簽軍萬人給鈔二十五貫戊午賑曹州饑築堡鹿門山夏四月辛巳製玉璽大小十紐甲午遣使祀岳瀆大名等路饑賑米十萬石五月丙午東平路饑賑米四萬一千三百餘石辛酉詔禁戍邊軍士牧踐屯田禾稼六月辛巳以招討怯綿征建都敗績又擅追唆火兒璽書金符處死壬午免益都新簽軍單于者千六百

二十一人爲民丁亥河南河北山東諸郡蝗癸巳救真定等路旱蝗其代縣築城役夫戶賦悉免之丙甲高麗國王王植遣其世子懌來朝賜植玉帶一懌金五十兩從官銀幣有差壬寅阿朮率兵萬五千人院宋萬山射黎岡鬼門關樵蘇之路癸卯詔董文炳等率兵二萬二千人南征東昌路飢賑米二萬七千五百九十石秋七月丁巳遣宋私罔四十五人還其國庚申水軍千戶邢德立張志等生擒宋荆鄂都統唐末堅賞銀幣有差辛酉製太常寺祭服壬戌西京大雨雹己巳立諸路蒙古字學癸酉立國子學詔遣官

審理諸路寃滯正犯死罪明白者各正典刑其雜犯死罪以下量斷遣之又詔諭宋國官吏軍民示以不欲用兵之意復遣都統領脫朶兒統領王昌國等往高麗點閱所備兵船及相視射羅等處道路立西蜀四川監榷茶場使司宋將夏貴率兵船二千至鹿門山萬戶解汝楫李庭率舟師敗之俘殺二千餘人獲戰艦五十艘八月己卯立金州招討司丙申以沙肅州鈔法未行降詔諭之詔諸路勸課農桑命中書省采農桑事列爲條目仍令提刑按察司與州縣官相風土之所宜講究可否別頒行之高麗國世子懋奏

其國臣僚擅廢國王王祖立其弟安慶公濟詔遣幹朶思不花李諤等往其國詳問條具以聞九月癸丑思州進嘉禾一莖三穗戊午敕民間貸錢取息雖踰限止償一本息己未授高麗世子王懋特進上柱國東安公戊戌豐州雲內東勝旱免其租賦戊辰敕高麗世子懋率兵三千赴其國難懋辭東安公乃授特進上柱國辛未敕管軍萬戶宋仲義征高麗以忽刺出史天澤並平章政事阿里中書右丞行河南等路中書省事賽典赤行陝西五路西蜀四川中書省事車駕至自上都幹朶思不花李諤以高麗刑部尚書

金方慶至奉權國王溍表訴國王植遘疾令弟溍權
國事冬十月己卯定朝儀服色壬午陞高唐冠氏並
爲州丁亥廣平路旱免租賦詔遣兵部侍郎黑的淄
來路總管府判官徐世雄召高麗國王王植王弟溍
及權臣林衍俱赴命國王頭輦哥以兵壓其境趙
璧行中書省于東京仍降詔諭高麗國軍民庚子太陰
犯辰星宋遣人餽鹽糧入襄陽我軍獲之賜諸王奧
魯赤駝鈕金鍍銀印十一月癸卯高麗都統領崔坦
等以林衍作亂挈西京五十餘城來附丁未簽王緯
洪茶丘軍三千人往定高麗高麗西京都統李延齡

乞益兵遣忙哥都率千兵二千赴之庚午諸路鰥寡
廢疾之人月給米二斗南安國王陳光昞遣使來貢
濟南饑以米十二萬八千九百石賑之高麗國王王
植遣其尙書禮部侍郎朴然從黑的入朝表稱受詔
已復位尋當入覲築新城于漢江西十二月戊子築
東安渾河堤己丑作佛事于太廟七晝夜高唐固安
二州饑以米二萬六百石賑之析彰懷德孟衛輝爲
三路陞林慮縣爲林州改楨州復爲韓城縣併省馮
翊等州縣十所以懿州廣寧等府隸東京是歲天下
戶一百六十八萬四千一百五十七賜諸王金銀幣

昂如成例斷死罪四十二人五十七...

兩等州縣十道以...

三級樹林...

東...

日...

斷...

齊...

...

...

...

本紀卷第七

元史七

...

...

世祖四

七年春正月...

耶律鑄康希...

政事忽都答...

言左丞制國...

用使司事張...

張惠簽制國...

...

有事已酉太倉
元早數諸投下官隸中書省壬子數
驛券無印者不
言比奉詔臣已
復位今從七百八人入覲詔令從四百
人來餘留之西
京詔高麗西京內屬改東寧府畫慈
悉嶺為界丁巳
以蒙哥為安撫高麗使佩虎符率兵
戍其西境戊午
均房州總管孫嗣擒宋統制朱興祖
等丙寅賑元魯
吾民戶鈔丁卯定省院臺文移體式
二月辛未朔以
刑中書右丞相伯顏為樞密副使甲
戌築昭應宮
馬梁河丙子帝御行宮觀劉秉忠字
許衡及太常
卿徐世隆所起朝儀大悅舉酒賜之

丁丑以歲饑罷脩築官城役夫甲申置尚書省署乙
酉立紙甲局申嚴畜牧損壞禾稼桑果之禁壬辰立
司農司以參知政事張文謙為卿設四道巡行勸農
司乙未歲襄陽出步騎萬餘人兵船百餘艘來趨萬
山堡萬戶張弘範千戶脫脫擊却敗之事聞各賜金
紋綾有差高麗國王王植來朝求見皇子燕王詔曰
汝一國主也見朕足矣植請以子懋見從之詔諭植
曰汝內附在後故班諸王下我太祖時亦都護先附
卽令齒諸王上附思蘭後附故班其下卿宜知之又
詔令國王頭輦哥等舉軍入高麗舊京以脫脫朶兒

焦天翼爲其國達魯花赤護送植還國仍下詔林衍廢立罪不可赦安慶國涓本非得已在所寬宥有能執送衍者雖舊在其黨亦必重增官秩世子懋奏乞隨朝及尚主不許命隨其父還國三月庚子朔日有食之改河南等路及陝西五路西蜀四川東京等路行中書省爲行尚書省尚書省臣言河西和糴應僧人豪官富民一例行之制可甲寅車駕幸上都丙辰浚武縣御河丁巳定醫官品從戊午益都登萊蝗旱詔減其今年包銀之半阿朮與劉整言圍守襄陽必當以教水軍造戰艦爲先務詔許之教水軍七萬餘

人造戰艦五千艘夏四月壬午檀州隕黑霜二夕設諸路蒙古字學教授敕諸路達魯花赤子弟蔭叙充散府諸州達魯花赤其散府諸州子弟充諸縣達魯花赤諸縣子弟充巡檢改御史臺典事爲都事癸未定軍官等級萬戶總管千戶百戶總把以軍士爲差已丑省終南縣入盩厔復真定贊皇縣太原樂平縣高麗行省遣使來言權臣林衍歿其子惟茂擅襲令公位爲尚書宋宗禮所殺島中民皆出降已遷之舊京衍黨裴仲孫等復集餘衆立植庶族承化侯爲王竄入珍島五月辛丑懷州河內縣大雨雹癸卯陝西

六史本紀卷七
三
簽省也速帶兒嚴忠範與東西川統軍司率兵及宋
兵戰於嘉定重慶釣魚山馬湖江皆敗之拔三寨擒
都統牛宣俘獲人民及馬牛戰艦無筭甲辰威州汝
鳳川番族八千戶內附其酋長來朝授宣命賜金符
下未東京路饑兼運糧造船勞役免今年絲銀十之
三以同知樞密院事合荅爲平章政事乙卯復平灤
路撫寧縣以海山昌黎入之丙辰括天下戶尚書省
臣言諸路課程歲銀五萬錠恐疲民力宜減十分之
一運司官吏俸祿宜與民官同其院務官量給工食
仍禁所司多取於民歲終較其增損而加黜陟上都

地里遙遠商旅往來不易特免收稅以優之惟市易
莊宅奴婢孳畜例收契本工墨之費管民官遷轉以
三十月爲一考數於變易人心苟且自今請以六十
月遷轉諸王遣使取索諸物及鋪馬等事自今並以
文移毋得口傳教令並從之改宣徽院爲光祿司秩
正三品以宣徽使線真爲光祿使庚申命樞密院閱
實軍數壬戌東平府進瑞麥一莖二穗三穗五穗者
各一本省中都打捕鷹坊總管府入工部大名東平
等路桑蠶皆災南京河南等路蝗減今年銀絲十之
三六月丙子敕西夏中興市馬五百疋庚辰敕戍軍

還有乏食及病者令所過州城村坊主者給飲食醫藥丁亥罷各路洞冶總管府以轉運司兼領徙謙州甲匠于松山給牛具賜皇子南木合馬六千牛三千羊一萬賜北邊戍軍馬二萬牛一千羊五萬丙申立籍田大都東南郊禁民擅入宋境剽掠秋七月辛丑設上林署乙卯賜諸王拜荅寒印及海青金符二庚申初給軍官俸壬戌僉諸道回回軍乙丑閱實諸路襍手戶都元帥也速帶兒等畧地光州敗宋兵十金剛臺以遼東開元等路總管府兼本路轉運司事山東諸路旱蝗免軍戶田租戍邊者給糧命達魯花赤

兀良吉帶給上都扈從畋獵糧八月戊辰朔築環城以逼襄陽己巳賑應昌府饑諸王拜荅寒部曲告饑命有車馬者徙居黃忽兒玉良之地計口給糧無車馬者就食肅沙甘州戊寅隆興府總管昔剌幹脫以盜用官錢罷庚辰以御史大夫塔察兒同知樞密院事御史中丞帖只爲御史大夫高麗世子王愷來賀聖誕節辛巳設應昌府官吏辛卯保定路霖雨傷禾稼九月庚子敕僧道也里可溫有家室不持戒律者占籍爲民丁巳太陰犯井丙寅括河西戶口定田稅宋將范文虎以兵船二千艘來援襄陽阿木合荅劉整

元史本紀卷七
五
率兵逆戰于灌子灘殺掠千餘人獲船三十艘丈虎引退西京饑敕諸王阿只吉所部就食大原山東饑敕益都濟南酒稅以十之二收糧冬十月戊辰朔敕兩省以已奏事報御史臺庚午太白犯右執法癸酉敕宗廟祭祀祝文書以國字乙亥宋人攻莒州乙酉享于太廟丁亥以南京河南兩路旱蝗減今年差賦十之六發清滄鹽二十四萬斤轉南京米十萬石並給襄陽軍已丑敕來年太廟牲牢勿用豢豕以野豕代之時果勿市取之內園車駕至自上都降輿中府爲州賑山東淄萊路饑十一月壬寅熒惑犯太微西

垣上將壬子河西諸郡諸王頓舍民協力供給丁巳赦益兵二千合前所發軍爲六千屯田高麗以忻都及前左僻總帥史樞並爲高麗金州等處經略使佩虎符領屯田事仍詔諭高麗國王立侍儀司安南國王陳光昞遣使來貢優詔荅之復賑淄萊路饑閏月丁卯朔高麗世子王懋還賜王植至元八年曆戊辰禁繒段織日月龍虎及以龍犀飾馬鞍者已巳給河西行省鈔萬錠以克歲費以義州隸婆娑府癸未詔諭西夏提刑按察司管民官禁僧徒冒據民田壬辰申明勸課農桑賞罰之法詔設諸路脫脫禾孫十

二月丙申朔改司農司爲大司農司添設巡行勸農使副各四員以御史中丞孛羅兼大司農卿安童言孛羅以臺臣兼領前無此例有旨司農非細事朕深論此其令孛羅總之命陝西等路宣撫使趙良弼爲秘書監克國信使使日本敕歲祀大社太稷風師雨師雷師戊戌徒懷孟新民千八百餘戶居河西壬寅陞御史大夫秩正二品降河南韶州爲澠池縣宋重慶制置朱禩孫遣謀者持書榜來誘安撫張大悅等天悅不發封併謀者送致東川統軍司丁未金齒驃國二部酋長阿匿福勒丁阿匿爪來內附獻馴象三

馬十九疋巳酉魚通路知府高曳失獲宋謀者詔賞之辛酉以都水監隸大司農司以諸王伯忽兒爲札魯忽赤之長建大護國仁王寺於高良河敕更定僧服色是歲天下戶一百九十二萬九千四百四十九賜先朝后妃及諸王金銀幣帛如歲例斷死刑四十四人宜令八年春正月乙丑朔高麗國王王植遣其祕書監朴恒郎將崔有滄來賀兼奉歲貢丙寅太陰犯畢巳卯以同僉河南等路行中書省事阿里海牙參知尚書省事中書省臣言前有旨令臣與樞密院御史臺議

河南行省阿里伯等所置南陽等處屯田臣等以爲
凡屯田人戶皆內地中產之民遠徙失業宜還之本
籍其南京南陽歸德等民賦自今悉折輸米糧貯於
便近地以給襄陽軍食前所屯田阿里伯自以無效
引伏宜令州郡募民耕佃從之史天澤告老不允救
前築都城徙居民三百八十二戶計其直償之設樞
密院斷事官遣兀都蠻率蒙古軍鎮西方當當丙戌
高麗安撫阿海畧地瑯島與逆黨遇多所亡失中書
省臣言謀知瑯島餘糧將竭宜乘弱攻之詔不許令
巡視險要常爲之備丁亥管如仁費正寅以國機事

爲書謀遣崔繼春賈靠山路坤入宋事覺窮治正寅
如仁繼春皆止典刑靠山坤並流遠方壬辰救諸路
鰥寡孤獨疾病不能自存者官給廬舍薪米高麗國
王王植遣使奉表爲世子懼情昏詔禁邊將受賂放
軍及科歛賑北京益都饑二月乙未朔定民間婚聘
禮幣貴賤有差丁酉發中都真定順天河間平灤民
一萬八千餘人築宮城己亥罷諸路轉運司入總管
府以尚書省奏定條畫頒天下移陝蜀行中書省於
興元癸卯四川行省也速帶兒言比因饑饉盜賊茲
多宜加顯戮詔令群臣議安童以爲強竊盜賊一皆

處死恐非所宜罪至死者仍舊待命以中書左丞東
京等路行尚書省事趙璧爲中書右丞甲辰添設監
察御史六員命忽都谷兒持詔招諭高麗林衍餘黨
裴仲孫乙巳大理等處宣慰都元帥寶合丁王傳闕
闊帶等協謀毒殺雲南王火你赤曹積發其事寶合
丁闊闊帶及阿老瓦丁亦速夫並伏誅賞積火你赤
及證左人金銀有差以沙州瓜州鷹坊三百人充軍
戊申詔事治事日程諭中外官吏敕往畏吾兒地市
米萬石庚戌申嚴東川井鹽之禁己未敕軍官佩金
銀符其民官工匠所佩者並拘入勿復給敕海青符

用太祖皇帝御署庚申奉御九住舊以梳櫛奉太祖
奉所落鬚髮東上詔積之藏于太廟夾室辛酉敕凡
訟而自匿及誣告人罪者以其罪罪之分歸德爲散
府割宿亳邳徐等州隸之升申州爲南陽府割唐鄧
裕嵩汝等隸之賑西京饑三月乙丑增治河東山西
道按察司改河東陝西道爲陝西四川道山北東西
道爲山北遼東道甲戌敕元正聖節朝會凡百官表
章外國進獻使臣陛見朝辭禮儀皆隸侍儀司丙子
改山東河間陝西三路鹽課都轉運司爲都轉運鹽
使司己卯中書省臣言高麗叛臣裴仲孫乞諸軍退

屯然後內附而忻都未從其請今願得全羅道以居
直隸朝廷詔以其飾辭遷延歲月不允辛巳復立夏
邑縣以碭山入焉省穀熟入睢陽濱棗萬戶韓世安
坐私儲糧食燒毀軍器詐乘驛馬及擅請諸王塔察
兒益都四縣分地等事有司屢以爲言詔誅之仍籍
其家甲申車駕幸上都乙酉許衡以老疾辭中書機
務除集賢大學士國子祭酒衡納還舊俸詔別以新
俸給之命設國子學增置司業博士助教各一員選
隨朝百官近侍蒙古漢人子孫及俊秀者克生徒丁
亥熒惑犯太微西垣上將巳丑立西夏中興等路行

尚書省以趣海參知行尚書省事命尚書省閱實天
下戶口頒條畫諭天下賑益都等路饑敕有司毋留
獄滯訟以致越訴違者官民皆罪之制封皇子燕王
乳母趙氏幽國夫人夫鞏德祿追封德有公夏四月
壬寅高麗鳳州經略司忻都言叛臣裴仲孫稽留使
命負固不服乞與忽林赤王國昌分道進討從之平
灤路昌黎縣民生子中夜有光詔加鞠養或以爲非
宜帝曰何幸生一好人母生嫉心也命高麗簽軍征
玠島癸卯給河南行中書省歲用銀五十萬兩仍敕
襄樊軍士自今人月給米四斗甲辰簽壯丁備宋戊

天啓二年丙午
元史本紀卷七
十一
午阿朮率萬戶阿剌罕等與宋將范文虎等戰于湍灘敗之獲統制朱勝等百餘人奪其軍器賞阿朮阿剌罕等金帛有差以至元七年諸路災蠲今歲絲料輕重有差五月乙丑以東道兵圍守襄陽命賽典赤鄭鼎提兵水陸並進以趨嘉定汪良臣彭天祥出重慶札剌不花出瀘州曲立吉思出汝州以牽制之改簽省也速帶兒鄭鼎軍前行尚書事賽典赤行省事于興元轉給軍糧丙寅牢魚國來貢己巳修佛事于瓊華島辛未分大理國三十七部爲三路以大理八部蠻酋新附降詔撫諭壬申造內外儀仗丁丑賑蔚

州饑己卯命史天澤平章軍國重事陞太府監爲正三品忻都史樞表言珍島賊徒敗散餘黨竄入耽羅辛巳賜河西行省金符銀海青符各一令蒙古官子弟好學者兼習筭術癸未升濟州爲濟寧府以玉宸院隸宣徽院高麗國王王禎遣使貢方物六月甲午敕樞密院凡軍事徑奏不必經由尚書省其于錢糧者議之上都中都河州濟南淄萊真定衛輝洛磁順德大名河南南京彰德益都順天懷孟平陽歸德諸州縣蝗癸卯宋將范文虎率蘇劉義夏松等舟師十萬援襄陽阿朮率諸將迎擊奪其戰船百餘艘敵敗

走平章合答又遣萬戶解汝楫等邀擊擒其總管朱日新鄭臯大破之辛亥敕凡管民官所領錢穀公事並俟年終考較乙卯招集河西翰端昂吉阿等處居民已未山東統軍司塔出董文炳偵知宋人欲據五河口請築城守之既而坐失事機宋兵已樹柵其地事聞敕決罰塔出文炳等有差遼州和順縣解州聞喜縣奸蚘生秋七月壬戌朔尚書省請增太原鹽課歲以鈔千錠為額仍令本路兼領從之設回回司天臺官屬以札馬刺丁為提點簽女直水達達軍以鄭元領祠祭岳瀆授司禋大夫丁卯南人李忠進言運

山侍郎張大悅嘗與宋交通以其事冊實詔諭大悅宋善用間朕不輕信毋懷疑懼以國工頭輦哥行尚書省于北京遼東等路辛未置左右一二衛親軍都指揮使司乙亥筆昌臨洮平涼府會南等州隕霜殺禾乙酉宋將米興國攻百文山營阿木擊破之追至滿灘斬首二千餘級高麗世子王湛八質珍島脅從民歲未降八月壬辰朔日有食之癸巳敕軍站之地四項以上依例輸租己亥詔招諭宋襄陽守臣呂文煥王子真駕至自上都遷成都統軍司於眉州己未聖誕節初立內外仗及雲和署樂位東川統兵司引

元史本紀卷之
兵攻宋銅鞮寨守寨總管李慶等降以慶知梁山軍
事九月壬戌朔敕都元帥阿朮以所部兵畧地漢南
葵亥高麗世子王健辭歸賜國王王植西錦優詔諭
之甲子賜劉整鈔五百錠鄧州田五百頃整辭改賜
民田三百戶科調如故給河南行省歲用鈔二萬八
千六百錠丙寅罷陝西五路西蜀四川行尚書省以
也速答兒行四川尚書省事于興元京兆等路直隸
尚書省敗宋軍于渦河戊辰陞成都府德陽縣爲德
州降虢州爲虢略縣壬申選胄子脫木兒等十人
業國學癸酉益都府濟州進士二本甲戌簽西夏

回回軍太廟殿柱朽壞監察御史劾都水劉最監造
不敬最以憂卒張易請先期告廟然後完葺從之丙
子敕今歲享太廟毋用犧牛太陰犯畢庚辰右衛親
軍都指揮使忽都等言五河城堡已成唯廬舍未完
凡材甓皆出宋境請率精兵分道抄掠從之壬午山
東路統軍司言宋兵攻膠州千戶蔣德等逆戰敗之
俘統制范廣等五十餘人獲戰船百艘癸未詔忙安
倉失陷米五千餘石特免徵仍禁諸王非理需索詔
以四川民力困弊免茶鹽等課稅以軍民田租給沿
邊軍食仍敕有司自今有言茶鹽之利者以違制論

冬十月癸巳大司農臣言高唐州達魯花赤忽都納
州尹張廷瑞同知陳思濟勸課有效河南府陝縣尹
王仔怠於勸課宜加黜陟以示勸懲從之丁酉享于
太廟巳未檀順等州風潦害稼賜高麗至元九年曆
十一月辛酉朔敕品官子孫保直勅遣阿魯忒兒等
撫治大理壬戌罷諸路交鈔都提舉司乙亥劉秉忠
及王磐徒單公履等言元正朝會聖節詔赦及百官
宣敕具公服迎拜行禮從之禁行金泰和律建國號
曰大元詔曰誕膺景命奄四海以宅尊必有美名紹
百王而紀統肇從隆古匪獨我家且唐之爲言蕩也

堯以之而著稱虞之爲言樂也舜因之而作號馴至
禹興而湯造互名夏大以殷中世降以還事殊非古
雖乘時而有國不以利而制稱爲秦爲漢者著從初
起之地名曰隋曰唐者因卽所封之爵邑是皆徇百
姓見聞之狃習要一時經制之權宜槩以至公不無
少貶我太祖聖武皇帝握乾符而起朔土以神武而
膺帝圖四震天聲大恢土宇輿圖之廣歷古所無頃
者耆宿詣庭奏章申請謂旣成于大業宜早定於鴻
名在古制以當然于朕心乎何有可建國號曰大元
蓋取易經乾元之義茲大治流形于庶品孰名資始

之功予一人底寧工萬邦尤切體仁之要事從因革道協天人於戲稱義而名固匪爲之溢美字休惟永尚不負於投艱嘉與敷天共隆大號丙戌置四川省於成都上都萬安閣成十二月辛卯朔詔天下興起國字學宣徽院請以闌遺漏籍等戶淘金帝曰姑止毋重勞吾民也乙巳減百官俸括西夏田名塔出董文炳赴闕辛亥併太常寺入翰林院宮殿府入少府監甲寅召尚書省遷入中書省是歲天下戶一百九十四萬六千二百七十賜先朝后妃及諸王金銀幣帛如歲例賜囊家等羊馬價鈔萬千一百六十七錠

斷死罪一百五人

九年春正月庚申朔高麗國王王植遣其臣禮賓卿宣文烈來賀兼奉歲貢甲子併尚書省入中書省平章尚書省事阿合馬同平章尚書省事張易並尚書平章政事參知尚書省事張惠爲中書左丞參知尚書省事李堯咨麥朮丁並參知中書政事罷給事中中書舍人檢正等官仍設左右司省六部爲四改稱中書丙寅詔遣不花及馬璘等高麗具舟糧助征航羅河南省請益兵敕諸路簽軍三萬丁丑敕皇子西平王奧魯赤阿魯帖木兒哥及南平王秃魯所部

與四川行省也速帶兒部一併忙古帶等十八族欲
速公弄等土番軍同征建都新安州初隸雄州詔爲
縣入順天庚辰改北京中興四川河南四路行尚書
省爲行中書省京兆復立行省仍命諸王只必帖木
兒設省斷事官給西平王奧魯赤馬價弓矢賜南平
王秃魯銀印及金銀符各五辛巳移鳳州屯田於鹽
白二州敕董文炳時巡掠南境毋令宋人得立城堡
敕軍民訟田者民田有餘則分之軍軍田有餘亦分
之民仍遣能臣聽其直其軍奴人民籍者還正之敕
燕王遣使持香旛祠岳瀆后土五臺興國寺命劉整

總漠軍壬午改山東東路都元帥府統軍司爲行樞
密院以也速帶兒塔出並爲行樞密院副使乙酉定
受宣勅宮禮儀詔元帥府統軍司總管萬戶府閱實
軍籍二月庚寅朔奉使日本趙良弼遣書狀官張鐸
同日本二十六人至京師求見辛卯詔札魯忽赤乃
太祖開創之始所置位百司右其賜銀印立左右司
壬辰高麗國王王植遣其臣齊安侯王淑來賀改國
號改中都爲大都甲午命阿木典蒙古軍劉整阿里
海牙典漢軍戊戌以去歲東平及西京等州縣旱蝗
水潦免其租賦庚子復唐州祕陽縣建中書省署於

大都戊申始祭先農如祭社之儀詔諸路開浚水利
車駕幸上都三月乙丑諭旨中書省日本使人速議
遣還安童言良弼請移金州戍兵勿使日本妄生疑
懼臣等以爲金州戍兵彼國所知若復移戍恐非所
宜但開諭來使此戍乃爲耽羅暫設爾等不須疑畏
也帝稱善甲戌括民間田教經焚之蒙古都元帥阿
朮漢軍都元帥劉整阿里海牙督本軍破樊城外郭
斬首二千級生擒將領十六人增築重圍守之賑濟
南路饑詔免醫戶差徭夏四月己丑詔於土蕃西川
界立寧河驛辛卯賜皇子愛牙赤所部馬丙午給西

平三與魯亦所部米甲寅賑大都路饑五月戊午朔
三和沐轉運司以小云失別爲使兼提奉文鈔使已
未給闕關出海青銀符二辛酉罷簽回回軍癸亥敕
拔部軍於怯處難之地開渠耕田丙寅簽徐邳二州
丁壯萬人戍邳州庚午減鐵冶戶罷西蕃充魯干等
處金銀礦戶爲民禁漢人聚衆與蒙古人鬪毆詔議
取孰羅及濟州辛巳敕修築都城凡費悉從官以給毋
取諸民并蠲伐木役夫稅賦甲申敕諸路軍戶
除至元七年前從良人民籍者當差餘雖從良並令
助本戶軍力乙酉太白犯畢距星宮城初建東西

左右掖門詔安集峇里伯所部流民六月壬辰遣高麗國西京屬城諸達魯花赤及質子金盞等歸國病乞望者忍也曰所入租仍遣南人百名給牛具是夜京師大雨壞墻屋壓死者衆祭已款以籍曰所儲糧賑民不足又發近地官倉濟之甲午高麗告饑轉東京米二萬石賑之己亥山東路行樞密院塔出於四月十三日遣步騎趨漣州攻破射龍溝五港口鹽場白頭河四處城堡殺宋兵三百餘人虜獲人牛萬計第功賞賚有差辛亥高麗國王王植請討耽羅餘寇秋七月丁巳朔河南省臣言往歲徙民實遺屯

耕以貧苦悉散還家今唐鄧蔡息徐邳之民愛其田廬仍守故屯願以絲銀準折輸糧而內地州縣轉粟餉軍者反厭苦之臣議今歲以遼州郡宜仍其舊輸糧內地州郡驗其戶數俾折鈔就以遼和遼庶幾便此交便利曰可拘括開元東京等路諸漏籍之粟私鬻田畝曆賑水達達部饑戊寅賜諸王八八部鈔集都城僧誦文藏經九會壬午和禮霍孫奏蒙古字誤國子學而漢官子弟未有學者及官府文移舊有畏吾字詔自今凡詔令並以蒙古字行仍遣百官子弟入學乙酉免徙大羅鎮居民令倍輸糧米給鷹方

詔開大都京兆等處禁馬赤奴戶名籍八月丙戌
明日有食之戊子立群牧所掌牧馬及尚方鞍勒正
辰敕亡安倉及靖州預儲糧五萬石以備弘吉刺新
徙部民及西人內附者厚給調兵增戍全羅州乙未
禁諸人以己事輒呼至專無號者丁酉立韓院所己
亥諸王闕陶出請以分地寧海登萊三州自為一路
與他三比歲賦惟入寧海無輸益都詔從之癸卯壬
子崔松敗宋襄陽援兵斬其將張順賜松等將士有
功者已車駕至自上都丁未改延州為延津縣與陽
德合南京癸丑賑遼宋等路饑九月甲子宋襄陽

將張貴以輪船出城順流突戰阿木阿刺海牙等舉
燈燃火燭江如晝率舟師轉戰五十餘里至櫃門關
生獲貴及將士二千餘人丙寅敕樞密院諸路正軍
貼戶及同籍親戚奴僕丁年既長依諸王權要以避
役者並還之軍惟匠藝精巧者以名聞癸酉同簽河
南省事崔斌訟右丞阿里妄奏軍數二萬敕杖而罷
之甲戌罷水軍總管府東川元帥李吉等略地開州
拔石羊寨擒宋將一人統軍使令刺等兵掠合州及
渠石口獲戰船五十艘賞銀幣有差兩子發民夫三
千人伐巨木遼東免其家徭賦戊寅太陰犯御女賑

益都路饑冬十月丙戌朔封皇子忙哥剌爲安西王
賜京兆爲分地駐兵六盤山遣使持詔諭扮卜忻都
國王壬辰享于太廟癸巳趙璧爲平章政事張易爲樞
密副使乙未築渾河堤戊戌熒惑犯填星巳亥敕自
七月至十一月終聽捕獵餘月禁之癸卯立文州初
立會同館十一月乙卯朔詔以至元十年曆賜高麗
壬辰發北京民夫六千伐木乾山蠲其家徭賦諸王
只必帖木兒築新城成賜名永昌府丙寅蠲昔剌幹
脫所負官錢丁卯太陰犯畢城光州遣無籍軍掠宋
境巳巳敕發屯田軍二千漢軍二千高麗軍六千仍

益武衛軍二千征耽羅辛未召高陸儒者楊恭懿不
至癸酉以前拔樊城外邪功賞千戶劉深等金銀符
巳卯併中書省左右司爲一宋荆湖制置李庭芝爲
書遣永寧僧賫金印牙符來授劉整廬龍軍節度使
封燕郡王僧至永寧事覺上聞敕張易姚樞雜問適整
至自軍中言宋患臣用兵襄陽欲以是殺臣臣實不
知敕令整爲書復之賞整使還軍中誅永寧僧及其
黨友參知行省政事阿里海牙言襄陽受圍久未下
宜先攻樊城斷其聲援從之回回亦思馬因創作巨
石砲來獻用力省而所擊甚遠命送襄陽軍前用之

十二月乙酉朔詔諸路府州司縣達魯花赤管民長官兼管諸軍與魯丁亥立肅州等處驛以東平府民五萬餘戶復爲東平路辛丑諸王忽剌出拘括逃民高麗界中高麗達魯花赤上其事詔高麗之民猶未安集禁罷之遣宋議互市使者南歸戊午賜北平王南木合軍馬一萬二千九百九十一羊六萬一千五百三十一及諸王塔察兒軍幣帛辛亥宋將魯萬壽來攻成都僉省嚴忠範出戰失利退保子城同知王世美等八人棄城遁詔以邊城失守罪在主將世美雖遁典免其罪惟遣使縛忠範至京師癸丑陞拱衛司馬拱衛直都指揮使司是歲天下戶一百九十五萬五千八百八十賜先朝后妃及諸王金銀幣帛如歲例斷死罪二十九人建大聖壽萬安寺

元史本紀卷七終

歲國濟取罪二十一人數大聖...
 萬二千八百人...
 同日...
 同日...

本紀卷第八

元史八

翰林學士中書平章知制誥...
 勅修

世祖五

十年春正月乙卯朔高麗國王王植遣其世子愷來
 朝戊午敕自今並以國字書宣命命忻都鄭溫洪茶
 立征耽羅宿州萬戶愛先不花請築堡牛頭山以扼
 兩淮糧運不允愛先不花因言前宋人城五河統軍
 司臣比日當得罪今不築恐蓋宋人所先帝曰汝言雖
 是若坐視宋人成之罪亦不免也安南使者還言陳

光祿受詔不拜中書移文責問... 西探馬赤軍已卯川蜀嘗言宋外日萬... 帶兒所部騎兵征遼都未還擬於京... 六千為援從之詔遣扎木呵押失寒... 兩命諸王阿不合市藥獅子國壬午

賞東川統軍合... 詔勘馬刺失里... 臣來朝高麗國... 聽自製兵仗... 巡行勸課務要

刺所部有功者合刺請於渠江之北... 西岸虎頭山立二成以其圖來上... 給京兆新簽軍五千益之二月丙... 受冊寶遣太常卿合丹告于太廟... 長阿旭叛詔有司安集其民募能... 遣斷事官麥肖勻校川陝行省錢穀... 乞帶脫因劉源使緬國論遣子弟... 王三禎以王師征耽羅乞下令禁... 從之丁未宋京西安撫使知襄陽... 三月甲寅朔詔申諭六司農司遣使

巡行勸課務要... 臣來朝高麗國... 聽自製兵仗... 巡行勸課務要

襄事有成乙丑敕樞密院以襄陽呂
文煥率將吏赴
關熟券置三城居之民仍居襄陽給
其田牛生券軍
分隸各萬戶置文煥等發襄陽擇蒙
古漢人有才力
者護視以來丙寅帝御廣英殿遣攝
太尉中書右丞
相安童授皇后弘吉刺氏玉冊玉寶
遣攝太尉同知
樞密院事伯顏授皇太子真金玉冊
金寶辛未以皇
后皇太子受冊寶詔告天下劉整請
教練水軍五六
萬及於興元金洋州汴梁等處造船
二千艘從之壬
申分金齒國為兩路癸酉客星青白
如粉絮起畢度
五車北後自文昌貫斗杓歷梗河至
左攝提凡二十

一日以前中書左丞相耶律鑄平章軍國重事中書
左丞張惠為中書右丞車駕幸上都西蜀嚴忠範以
罪罷遣察不花等撫治軍民罷中興等處行中書省
夏四月癸未朔阿里海牙以呂文煥入朝授文煥昭
勇大將軍侍衛親軍都指揮使襄漢大都督賜其將
校有差時將相大臣皆以聲罪南伐為請驛名姚樞
許衡徒單公履等問計公履對曰乘破竹之勢席卷
三吳此其時矣帝然之詔罷河南等路行中書省以
平章軍國重事史天澤平章政事阿朮叅知政事阿
里海牙行荆湖等路樞密院事鎮襄陽左丞相合丹

叅知行中書省事劉整山東都元帥塔出董文炳行
淮西等路樞密院事守正陽天澤等陞辭詔諭以襄
陽之南多有堡寨可乘機進取仍以鈔五千錠賜將
士及賑新附軍民甲申免隆興路權課三年丁酉敕
南儒爲人掠賣者官贖爲民辛丑罷四川行省以鞏
昌二十四處便宜總帥汪良臣行西川樞密院東川
閬蓬廣安順慶夔州利州等路統軍使合刺行東川
樞密院東川副統軍王仲仁同僉行樞密院事仍命
汪良臣就率所部軍以往五月壬子朔定內外官復
舊制三歲一遷甲寅禁無籍軍從大軍殺掠其願爲

軍者聽戊辰詔天下獄囚除殺人者待報其餘一切
疎放限以八月內自至大都如期而至者皆赦之乙
亥詔免民代輸簽軍戶絲銀及伐木夫戶賦稅負前
朝官錢不能償者毋徵主守失陷官錢者杖而釋之
陣亡軍及營繕工匠無丁產者量加廩給以雄易州
復隸大都庚辰賞襄陽有功萬戶奧魯赤等銀鈔衣
服有差六月乙酉賑諸王塔察兒部民饑丁亥以各
路弓矢甲匠並隸軍器監免大都南京兩路賦役以
紓民力賑甘州等處諸驛辛卯汰陝西貧難軍以劉
整阿里海牙不相能分軍爲二各統之癸巳敕襄陽

造戰船千艘甲午改資用庫爲利用監丁酉置光州
等處招討司戊申經畧忻都等兵至耽羅撫定其地
詔以失里伯爲耽羅國招討使尹邦寶副之陞拱衛
直爲都指揮司使日本趙良弼至太宰府而還具以
日本君臣爵號州郡名數風俗土宜來上閏月癸丑
敕諸道造甲一萬弓五千給淮西行樞密院巳巳罷
東西兩川統軍司辛未以翰林院纂修國史敕采錄
累朝事實以備編集丙子以平章政事賽典赤行省
雲南統合刺章鴨赤赤科金齒茶罕章諸蠻賜銀二
萬五千兩鈔五百錠秋七月辛巳以金州軍八百人

反統軍司還成都忽朗告軍千人隸東川壬午以修
太廟將遷神主別殿遣兀魯忽奴帶張文謙祭告丙
戌敕樞密院襄陽生券軍無妻子者發至京師仍益
兵衛送其老疾者遣還家庚寅河南水發粟賑民饑
仍免今年田租省西涼府入未昌路戊申高麗國王
王植遣其順安公王侗同知樞密院事宋宗禮賀皇
后皇太子受冊禮成八月庚戌朔前所釋諸路罪囚
自至大都者凡三十二人並赦之甲寅鳳翔寶鷄縣
劉鐵妻一產三男復其家三年丁丑聖誕節高麗王
王植遣其上將軍金詵來賀巳卯賜襄陽生熟券軍

冬衣有差九月辛巳遼東饑弛獵禁以合伯爲平章
政事壬午立河南宣慰司供給荆湖淮西軍需甲申
襄陽生券軍至大都詔伯顏諭之釋其械繫免死罪
聽自立部伍俾征日本仍敕樞密院具鎧仗人各賜
鈔娶妻於蒙古漢人內選可爲率領者丙戌劉秉忠
姚樞王磐竇默徒章公履等上言許衡疾歸若以太
子資善王恂主國學庶幾衡之規模不致廢墜又請
增置生員並從之秉忠等又奏置東宮宮師府詹事
以次官屬三十八人戊子遣官詣荆湖行省差次有
功將士禁京畿五百里內射獵己丑敕自今秋獵鹿

豕先薦太廟壬辰中書省臣奏高麗王王祖屢言小
國地狹比歲荒歉其生券軍乞駐東京詔令營北京
界仍敕東京路運米二萬石以賑高麗丁酉立正陽
諸驛敕河南宣慰司運米三十萬石給淮西合荅軍
仍給淮西京湖軍需有差壬寅敕會同館專居降附
之人覲者以翰林學士承旨和禮霍孫兼會同館事
以主朝廷咨訪及降臣奏請征東招討使塔匣刺請
征骨嵬部不允丙午置御樂院車駕至自上都給諸
王塔察兒所部布萬疋冬十月乙卯享于太廟丙辰
以西川編民東川義士軍屯田餉潼川青居戍兵敕

伯顏和禮霍孫以史天澤姚樞所定新格參考行之
庚申御史臺臣言没人賊罰爲鈔一千三百定詔有
貧乏不能存者以此賑之有司斷死罪五十人詔加
審覆其十三人。因鬪毆殺人免死充軍。餘令再三審
覆以聞。禁牧地縱火以合荅帶爲御史大夫陞襄陽
府爲路罷廣寧府新僉軍初建正殿寢殿香閣周廡
兩翼室西蜀都元帥也速荅兒與皇子奧魯赤合兵
攻建都蠻擒酋長下濟等四人獲其民六百建都乃
降詔賞將士有差十一月癸未命布只兒修起屋住
丁未大司農司言中書移文以畿內秋禾始收讀休

農民覆耕恐妨農事帝以農事有益詔勿禁十二月
己酉朔安童等言昔博赤伯都謂總管府權太重宜
立運司并諸軍與魯以分之臣以今之民官循例遷
徙保無邪謀別立官府於民未便帝然之壬子賜襄
樊被傷軍士鈔千錠甲寅宋夏貴攻正陽淮西行院
擊走之壬戌召阿木同呂文煥入覲大司農司請罷
西夏世官括諸色戶從之安南國王陳光兩遣使來
貢方物諸王薛閣禿以罪從軍累戰皆捷召赴闕已
已省陝州號畧朱陽二縣入靈寶賜萬戶解汝楫銀
萬五千兩諸王李元兒出塞所部兵與皇子北平王

合軍討叛臣聶古伯平之賞立
金銀幣帛如歲例是歲諸路蠲
元分賑米凡五十四萬五千五
百九十六萬二千七百九十五
十一年春正月己卯朔宮闕告
天子諸王百官朝賀高麗國王
孫等來賀兼奉歲貢乙酉以金
陽生熟券軍千人戍鴨池庚寅
官格免諸路軍雜賦以恤古幣
五百人戍建都立建

將士有差賜諸王
灾五分霖雨害稼
九十石天下戶二
帝始御正殿受皇
植遣其少卿李義
招討使欽察率襄
立軍官以功陞散
新舊軍一萬一千
府兼領互市監

辰置西蜀四川屯田經畧司丁酉
蘇醮七晝夜敕荆湖行院以軍三
隸淮西行院丙午彰德趙當道等
者論罪有差立于闐鴉兒看兩城
陸驛二免于闐米王工差役阿里
用武之地漢水上流已為我有順
阿木又言臣畧地江淮備見宋兵
之時不能再帝趣召史天澤同議
事可命重臣一人如安童伯顏都
同可計日而待免臣老矣如副將

者猶足為之
海牙言荆襄自古
流長驅宋必可平
弱於往昔今不取
天澤對曰此國大
皆諸軍則四海混
者猶足為之

伯顏可以任吾此事矣。阿木阿里海牙因言悉師南
征必分為三。舊軍不足。非益兵十萬不可。詔中書省
僉軍十萬人。二月戊申朔賜阿木所部將士及茶罕
章阿吉老蒼等銀鈔有差。甲寅大陰犯井宿庚申新德
副元帥楊堯元戰沒。以其子襲職。初立儀鸞局掌宮
門管鑰。供帳燈燭。壬申造戰船八百艘於汴梁。以廉
希憲為中書右丞。北京等處行中書省事。車駕幸上
都。三月己卯詔以勸課農桑諭高麗國王。王植仍命
安撫高麗軍民總管洪茶丘提點農事。己丑呂文煥
隨司千戶陳炎謀叛。誅首惡二人。其隨司軍併其妻

子皆令內徙。庚寅敕鳳州經畧使忻都高麗軍民總
管洪茶丘等將屯田軍及女直軍并水軍合萬五千
人戰船大小合九百艘。征日本。移碣門兵戍合谷城。
辛卯改荆湖淮西二行樞密院為二行中書省。伯顏
史天澤並為左丞相。阿木為平章政事。阿里海牙為
右丞。呂文煥為參知政事。行中書省於荆湖。合谷為
左丞相。劉整為左丞。塔出董文炳為參知政事。行中
書省於淮西。遣使代祀嶽瀆。后土河南宣慰司言軍
興轉輸煩重。宜賦軍匠諸戶權助財用。從之。癸巳獲
嘉縣尹常德。課最諸縣。詔優賞之。亦乞里帶強取民

租產桑園廬舍墳墓分爲探馬赤軍牧地詔還其民
萬戶阿里必嘗發李壇逆謀爲壇所殺以其子刺刺
吉襲職改金州招討司爲萬戶府遣要速木咱興愍
失招諭八魯國帝師八合思八歸土番國以其弟亦
鄰真襲位建大護國仁王寺成夏四月辛亥分陝西
隴右諸州置提刑按察司治鞏昌癸丑初建東宮甲
寅誅西京訛言惑衆者括諸路馬五萬匹辛未詔安
慰幹端鴉兒看合失合兒等城賜襄樊戰死之士二
百四十九人之家每家銀百兩乙亥命也速帶兒將
千人同撒吉思所部五州丁壯戍益都五月丙戌汪

惟正以所部軍逃亾乞於民站戶選補從之敕北京
東京等路新簽軍恐不宜暑權駐上都乙未樞密院
臣言舊制蒙古軍每十人月食糧者惟拔都二人今
遣怯薛丹合丹覈其數多籍二千六百七十人敕杖
合丹斥無入宿衛謫往西川效死軍中餘定罪有差
丙申以皇女忽都魯揭里迷失下嫁高麗世子王愷
辛丑敕隨路所僉新軍其戶絲銀均配於民者並除
之六月丙午朔劉整乞益甲仗及水弩手給之庚戌
賜建都合馬里戰士銀鈔有差癸丑敕合答選部下
蒙古軍五千人與漢軍分戍沿江堡隘爲使傳往來

之衛仍以古不來拔都翟文彬率兵萬人掠荆南鴉山以綴宋之西兵丙辰免上都隆興兩路簽軍庚申問罪於宋詔諭行中書省及蒙古漢軍萬戶千戶軍士曰爰自太祖皇帝以來與宋使介交通憲宗之世朕以藩職奉命南伐彼賈似道復遣宋京詣我請罷兵息民朕卽位之後追憶是言命郝經等奉書往聘蓋爲生靈計也而乃執之以致師出連年死傷相藉係累相屬皆彼宋自禍其民也襄陽旣降之後冀宋悔禍或起令圖而乃執迷罔有悛心所以問罪之師有不能已者今遣汝等水陸並進布告遐邇使咸知

之無辜之民初無預焉將士毋得妄加殺掠有去逆效順別立奇功者僉等第遷賞其或固拒不從及逆敵者俘戮何以甲子分遣忙古帶八都百家奴率武衛軍南征丙寅以合刺合孫爲中書左丞崔斌叅知政事仍行河南道宣慰司事敕有司閱覈延安新軍貧無力者免之戊辰監察御史言江淮未附將帥闕人今首用阿里海牙子忽失海牙劉整子瑛素不知兵且缺人望宜依弟男例罷去從之秋七月乙亥朔敕山北遼東道提刑按察使元魯失不花同叅知政事廉希憲行省北京國王頭輦哥母署事有大事則

希憲等就議乙酉徙生券軍八十一人屯田和林癸巳高麗國王王植薨遣使以遺表來上且言世子懋孝謹可付後事勅同知上都留守司事張煥毋懋爲高麗國王乙未伯顏等陛辭帝諭之曰古之善取江南者唯曹彬一人汝能不殺是吾曹彬也興元鳳州民獻麥一莖四穗至七穗穀一莖三穗八月甲辰朔頒諸路立社稷壇壝儀式丁未史天澤言今大師方興荆湖淮西各置行省勢位旣不相下號令必不能一後當敗事帝是其言復改淮西行中書省爲行樞密院癸丑行中書省言江漢未下之州請令呂文煥

率其麾下臨城諭之令彼知我寬仁善遇降將亦策之善者也從之甲寅弛河南軍器之禁辛未高麗王懋遣其樞密使朴瑒來賀聖誕節詔太原新僉軍遠戍兩川誠可憫恤諭樞密院遣使分括廩粟給其家九月丙戌行中書省以大軍發襄陽檄諭宋州郡官吏將校士民癸巳師次鹽山距郢州二十里宋兵十餘萬當郢夾漢水城萬勝堡兩岸戰艦千艘鐵鉅橫江貫大艦數十遏我舟師不得下惟黃家灣有溪經鷓子山入唐港可達于江宋又爲埧築堡其處駐兵守之繫舟數百與埧相依伯顏督諸軍攻拔之鑿埧

撓舟入溪。出唐港整列而進。車駕至自上都冬十月
已酉享于太廟庚申長河西千戶必刺冲剽掠甲仗
集衆為亂火你赤移戌未還副元帥覃澄率屬吏赴
之帝曰澄不必獨往趣益兵三千付火你赤合力討
之壬戌歲星犯壘壁陳乙丑伯顏督諸將破沙洋堡
生擒守將串樓王翌日次新城總制黃順絕城降。伯
顏遣順招都統邊居義不出總管李庭破其外堡諸
軍蟻附而登拔之居義自焚死辛未賜北平王南木
合馬三萬羊十萬十一月庚辰斷死罪三十九人壬
午勅西川行樞密院也速帶兒取嘉定府癸未符寶

郎董文忠言比聞益都彰德妖人繼發其按察司達
魯花赤及社長不能禁止宜令連坐詔行之乙酉軍
次復州宋安撫使翟貴出降丁亥詔宋嘉定安撫魯
萬壽及凡守城將校納款來降與避罪及背主叛亾
者悉從原免癸巳東川元帥楊文安與青居山蒙古
萬戶怯烈乃也只里等會兵達州直趨雲安軍至馬
湖江與宋兵遇大破之遂拔雲安羅拱高陽城堡賜
文安等金銀有差以香河荒地千頃置中衛屯伯顏
遣萬戶帖木兒譯史阿里奏沙洋新城之捷且以新
城總制黃順來見賜順黃金錦衣及細甲授湖北道

宣慰使佩虎符救京師盜詐者衆宜峻立治法召征
日本忽敦忽察劉復亨三沒合等赴闕壬寅安童以
阿合馬擅財賦權蠹國害民凡官屬所用非人請別
加選擇其營作宮殿夤緣爲姦亦宜詰問帝命窮治
之起閣南直大殿及東西殿增選樂工八百人隸教
坊司十二月丙午伯顏大軍次漢口。宋淮西制置使
夏貴都統高文明劉儀以戰船萬艘分據諸隘都統
王達守陽羅堡。荆湖宣撫朱禩孫以遊擊軍扼中軍
師不得進。用千戶馬福言自漢口開渠引船會淪河
口徑趨沙蕪遂入大江。癸丑以諸路逃奴之無主者

二千人隸行工部甲寅賞忻都等征耽羅功銀鈔幣
帛有差乙卯阿里海牙督萬戶張弘範等攻武磯堡
宋夏貴以兵來援阿朮率萬戶晏徹兒等四翼軍對
青山磯泊丙辰萬戶史格以一軍先渡爲宋荆鄂諸
軍都統程鵬飛所敗。總管史塔刺渾等率衆赴敵鵬
飛敗走進軍沙洲抵觀音山夏貴東走遂破武磯堡
斬宋都統王達始達南岍追至鄂州南門而還丁巳
伯顏登武磯山宋朱禩孫遁歸江陵己未師次鄂州
宋直秘閣湖北提舉張晏然權知漢陽軍。王儀知德
安府來興國並以城降程鵬飛以本軍降伯顏承制

以宋鄂州民兵總制王該知鄂州事王儀來興國仍
舊任撤其戍兵分隸諸軍下令禁侵暴凡逃民悉縱
還之以阿里海牙兵四萬鎮鄂漢伯顏阿朮將大軍
水陸東下。以待衛親軍都指揮使禿滿帶爲諸軍殿
以襄陽路總管賈居貞爲宣撫使商議行中書省事
庚申淮西正陽火廬舍甲仗焚蕩無餘杖萬戶愛先
不花等有差癸亥賜太一真人李居素第一區仍賜
額曰太乙廣福萬壽官行中書省以渡江捷聞敕縱
呂文煥隨司軍悉還家割南陽盧氏縣隸嵩州置歸
德水城縣長武縣省入涇川良原縣省入靈臺是歲
天下戶一百九十六萬七千八百九十八諸路好蚘
等蟲災凡九所民饑發米七萬五千一百四十五石
粟四萬五百九十九石以賑之

十二年春正月癸酉朔高麗國王王懋遣其判閣事
李信孫來賀及奉歲幣甲戌大軍次黃州宋泚江制
置副使知黃州陳奕以城降伯顏承制授奕泚江大
都督其子巖知漣州奕遣人以書諭之書至巖即出
降乙亥徙襄陽新民七百戶於河北東川副都元帥
張德潤拔禮義城殺宋安撫使張資招降軍民千五
百餘人繼遣元帥張桂孫略地俘總管郭武及都轄

唐惠等六人以歸賜德潤金五十兩及西錦金鞍細甲弓矢部下將士鈔五百錠戊寅劉整卒安西王相府乞給鈔萬錠爲軍需勅以千錠給之癸未師次蘄州宋安撫使管景模以城降乙酉勅樞密院以納忽帶兒也速帶兒所統戍軍及再簽登萊丁壯八百人付五州經略司其鄴城十字路亦聽經略司節度丙戌大軍次江州宋江西安撫使知江州錢真孫及淮西路六安軍曹明以城降丁亥樞密院臣言宋邊郡如嘉定重慶江陵郢州漣海等處皆阻兵自守宜降璽書招諭從之宋知南康軍葉闔以城降敕以待衛

親軍指揮使札的失囊加帶將蒙古軍二千百家奴唐古忙兀兒將漢軍萬人赴蔡州禿滿帶賈亡古帶復將餘兵赴闕己丑遣伯大唐永堅賚詔招諭郢州仍勅襄陽統軍司調兵三千人衛送永堅等選蒙古畏吾漢人十四人赴行中書省爲新附州郡民官庚寅遣左衛指揮副使鄭溫唐古帖木兒率衛軍萬人同札的失囊加帶戍黃州詔諭重慶府制置司并所屬州郡城寨官吏軍民舉城歸附壬辰以宣撫使賈居貞簽書行中書省事戍鄂州安南國使者還敕以舊制籍戶設達魯花赤簽軍立站輸租及歲貢等事

諭之乙未遣兵部尚書廉希賢工部侍郎嚴忠範秘書監丞柴紫芝奉國書使于宋丁酉以萬家奴所募願爲軍者萬人南征己亥雲南總管信苴日石買等刺殺合刺章舍里威之爲亂者以金賞之命土魯至雲南趣阿魯帖木兒入覲以蠻夷未附者尚多命宣慰司兼行元帥府事並聽行省節度置郡縣尹長選廉能者任之置雲南諸路規措所以贍思丁爲使益衛送唐永堅兵永堅求拜都忙古帶偕行許之敕追諸王海都八刺金銀符三十四二月癸卯大軍次安慶府宋殿前都指揮使知安慶府范文虎以城降伯

顏承制授文虎兩浙大都督甲辰以中書右丞博魯歡爲淮南都元帥中書右丞阿里左右副都元帥仍命阿里撒吉思等各部蒙古漢軍會邳州又發蘄宿戍兵將河南戰船千艘赴之遣必闡赤字羅檢覈西夏樵課命開元宣撫司賑吉里迷新附饑民救畏吾地春夏毋獵孕字野獸立后土祠于平陽之臨汾伏羲女媧舜湯河瀆等廟于河中解州洪洞趙城丙午大軍次池州宋權州事趙卯發自經死都統制張林以城降省西夏中興都轉運司入總管府議以中統鈔易宋交會并發祭州鹽貿易樂材丁未禁無籍自

效軍俘掠新附復業軍民戊申詔諭江黃鄂岳漢陽安慶等處歸附官吏士民軍匹僧道人等令農者就來商者就塗士庶緇黃各安已業如或鎮守官吏妄有搔擾詣行中書省陳告史天澤卒召游顯楊庭訓趙闕賜陳言人霍昇張和鈔十錠俾從淮東元帥府南征庚戌遣禮部侍郎杜世忠兵部郎中何文著賚書使日本國辛亥遣同知濟南府事張漢英持詔諭淮東制置使李庭芝壬子洛磁路總管姜毅捕獲農民郝進等四人造祆言惑衆敕誅進餘減死流遠方宋都督賈似道遣計議宋京承宣使阮思總詣行中

書省請還已降州郡約貢歲幣伯顏使囊加帶同阮思聰還報命留宋京以待使謂似道曰未渡江時入貢議和則可今沿江諸郡皆已內屬欲和則當來面議也囊加帶還乃釋宋京以同簽樞密院事倪德政赴鄂州省治財賦癸丑御史臺臣劾前南京路總管田大成以其弟婦趙氏爲妻廢絕人倫敕杖八十三年不齒時大成已死惟市杖趙氏八十丙辰賞征東元帥府日本戰功錦絹弓矢鞍勒庚申遣塔不帶幹魯召鄂漢降臣張晏然等赴闕仍諭之曰朕省卿所奏云宋之權臣不踐舊約拘留使者實非宋主之罪

儻蒙聖慈。止罪擅命之臣。不令趙氏乏祀者。卿言良是。卿既不忘舊主。必能輔弼我家。比卿奏上。已遣伯顏按兵不進。仍遣兵部尚書廉希賢等持書往使。果能悔過來附。既往之愆。朕復何究。至於權臣賈似道。尚無罪之之心。况肯令趙氏乏祀乎。若其執迷罔悛。未然而事。朕將何言。天其鑒之。辛酉。以闊闊出率其部下軍千人及親附軍五百聽阿刺海牙節制。凡湖南州縣及瀕水之民有來附者。俾闊闊出統之。拒敵不降者。就為招集。詔令大洪山避兵民還歸漢陽。復業農畝。命阿刺海牙鎮守之。又命阿失罕唐永堅某

公直等與脫烈將甲騎千人持詔招諭鄧州大軍。次丁家洲。戰船蔽江而下。宋賈似道分遣步帥孫虎臣及督府節制軍馬蘇劉義集兵船于江之南北岸。似道與淮西制置使夏貴將後軍戰船二千五百餘艘橫亘江中。翌日伯顏命左右翼萬戶率騎兵夾岸而進。繼命舉巨砲擊之。宋兵喧動。夏貴先遁。似道錯愕失錯。烏鈺斥諸軍散。宋兵遂大潰。阿失罕鎮撫何瑋李庭等舟師及步騎追殺百五十里。得船二千餘艘。及軍資器仗督府圖籍符印。似道東走揚州。阿失罕不花言夏貴縱兵軍岳全還。瑋欲內附。宜降。重書招諭。

遂遣其男胡應雷持詔往諭之。甲子，大軍次蕪湖。孫
宋江東運判知太平州孟之。以城降。都元帥博魯
歡次海州。知州丁順以城降。乙丑，阿里海牙言江陵
宋巨鎮。地居大江上流，屯精兵不啻數十萬。若非乘
此破竹之勢取之，江水泛溢，鄂漢之城亦恐難守。從
其請，仍降璽書遣使諭江陵府制置司及高達已下
官吏軍民。宋福州團練使知特摩道事農士貴率知
那寡州農天或知阿吉州農昌成知上林州農道賢
州縣三十有七，戶十萬，詣雲南行中書省請降。丙寅，
樞密院言渡江初，亳州萬戶史格毗陽萬戶石抹

祖以輕進致敗，乞罪之。有旨：或決罰降官，或以戰功
自續其從行省，裁處禁民間賭博犯者流之。北地。戊
辰，師次采石鎮。知和州王善以城降。都元帥博魯歡
次漣州。宋知州孫嗣武以城降。己巳，復遣伯木唐永
堅等宣諭郢州。官吏士庶庚午，大軍次建康府。宋沿
江制置使趙潛南走。都權兵馬司事徐王榮翁福統
茅世雄等及鎮軍曹旺以城降。宋賈似道至揚州。始
遣總管段佑送國信使郝經。劉人傑等來歸。敕樞密
院迎經等由水路赴闕。詔安南國王陳光昞仍以舊
制六事諭之。趣其來朝。命怯薛丹察罕不花侍儀副

使關思義真人李德和代祀嶽瀆后土車駕幸上都
三月壬申朔宋鎮江府焉軍總管石祖忠以城降行
中書省分遣淮西行樞密院阿塔海駐京口宋誅殿
帥韓震其部將李大明等二百人携震母妻并諸子
文焞文焮自臨安來奔甲戌宋江陰軍僉判李世修
以城降乙亥諭樞密院比遣建都都元帥火你赤征
長河西以副元都帥單澄鎮守建都付以璽書安集
其民仍敕安西王忙元刺諸王只必帖木兒駙馬長
吉分遣所部蒙古軍從西平王奧魯赤征吐蕃命萬
執中唐永堅同前所遣阿告罕等將銳兵千人同往

招諭郢州已代則鎮之下降則從陸路與阿里海牙
忽不來會於荆南丙子國信使廉希賢等至建康傳
旨令諸將各守營壘母得妄有侵掠宋知滁州王文
虎以城降戊寅賜皇子安西王幣帛八千匹絲萬斤
乙卯改平陰縣新鎮寨爲肥城縣隸濟寧府庚辰宋
知寧國府顏紹卿以城降江東路得府二州五軍二
縣四十二戶八十二萬一千八百五十二口一百九
十一萬九千一百六甲申於中興路置懷遠靈武二
縣分處新民四千八百餘戶丙戌宋常州安撫戴之
泰通判王虎臣以城降國信使廉希賢嚴忠範等至

宋廣德軍獨松闕爲宋人所殺。丁亥免諸路軍雜賦。辛卯宋將高世傑復據岳州。質知州孟子紹妻子。又取復州降將翟貴妻子送之江陵。世傑會郢復岳三州。及上流諸軍戰船數千艘。兵數萬人。扼荆江口。壬辰阿里海牙以軍屯于東崖。世傑夜半遁去。黎明至洞庭湖口。兵船成列而陣。阿里海牙督諸翼萬戶及水軍張榮實解汝楫等逐世傑于湖口之夾灘。遣郎中張鼎召世傑。世傑降。阿里海牙以世傑招岳州孟之紹亦以城降。以世傑力屈而降。諒之。賜北平王南木合所部馬二千一百八十羊三百。癸巳敕郟城沂

州十字路戍兵從博魯歡征淮南。丙申側布蕃官稅。昔確州蕃官莊寮男市甲等率四十三族戶五千一百六十詣四川行樞密院來附。戊戌遣山東路經畧使王儼戍岳州。庚子從王磬竇默等請分置翰林院。專掌蒙古文字。以翰林學士承旨撒的迷底里主之。其翰林兼國史院仍舊纂修國史典制。誥備顧問。以翰林學士承旨兼修起居注和禮霍孫主之。辛丑敕阿木分兵取揚州。夏四月壬寅朔賞討長河西必刺。充有功者及陣亡者金銀鈔幣帛。各有差。乙巳改西夏中興道按察司爲隴右河西道。丙午立漣州新城。

清河三驛阿里海牙駐軍江陵城南沙市攻其柵破之知荆門軍劉懋降丁未阿里海牙這郎中張鼎齋詔入江陵宋荆湖制置朱禩孫湖北制置副使高達京西湖北提刑青陽夢炎李湜始出降阿里海牙入江陵分道遣使招諭未下州郡知峽州趙真知歸州趙仔權澧州安撫毛浚常德府新城總制魯希文舊城權知府事周公明等悉以城降辛亥遣使招諭宋五郡鎮撫使呂文福使降甲寅諭中書省議立登聞鼓如為人殺其父母兄弟夫婦冤無所訴聽其來擊其或以細事唐突者論如法辛酉宋郢州安撫趙孟

復州安撫翟貴以城降宋度支尚書吳浚移書建康徐王榮等述其丞相陳宜中語請罷兵通好伯顏遣中書議事官張羽淮西行院令史王章同宋來使馬馭持徐王榮復書至平江府驛亭悉為宋所殺癸亥阿木師駐瓜洲距揚州四十五里宋淮東制置司盡焚城中廬舍遷其居民而去阿木創立樓櫓戰具以守之丙寅立尚牧監賜降臣丁順等衣服免京畿百姓今歲絲銀丁卯以大司農御史中丞索羅為御史大夫罷隨路巡行勸農官以其事入提刑按察司括諸寺闡遺人口庚午以高達為叅知政事仍詔慰諭

之遣兵部郎中王世英刑部郎中蕭郁持詔召嗣漢
四十代天師張宗演赴闕五月辛未朔阿里海牙以
所俘童男女千人牛萬頭來獻樞密院言峽州宜以
戰船扼其津要又郢復二州戍兵不足今擬襄陽等
處選五千七百人隸行中書省聽阿里海牙調遣從
之詔中書右丞廉希憲叅知政事脫博忽魯秃花行
中書省于江陵府阿里海牙還鄂州立襄陽至荆南
三驛丁丑何木立木柵于楊子橋斷淮東糧道且爲
瓜州藩蔽庚辰詔論叅知政事高達曰昔我國家出
征所獲城邑卽委而去之未嘗置兵戍守以此連年

征伐不息夫爭國家者取其土地人民而已雖得其
地而無民其誰與居今欲保守新附城壁使百姓安
業力農蒙古人未之知也爾熟知其事宜加勉旃湖
南州郡皆汝舊部曲未歸附者何以招懷生民何以
安業聽汝爲之宋嘉定安撫魯萬壽遣部將李立奉
書請降言累負罪愆乞加赦免詔遣使招諭之辛巳
宋知辰州呂文興黃仙洞行隋州事傅安國仙人寨
行均州事徐鼎知沅州文用圭知靖州康玉知房州
李鑑等皆以城降荆南湖北路凡得府三州十一軍
四縣五十七戶八十萬三千四百一十五口一百九

十四萬三千八百六十丙戌以三衛新附生券軍赴
八達山屯田丁亥召伯顏赴闕以蒙古萬戶阿剌罕
權行中書省事遣肅州達魯花赤阿沙簽河西軍萬
戶愛先不花違伯顏節制擅撤戍兵詔追奪符印使
從軍自效淮東宣撫陳巖乞解官終喪三年不許申
嚴屠牛馬之禁庚寅宋五郡鎮撫使呂文福來降壬
辰宋都統制劉師勇殿帥張彥據常州癸巳諭高麗
國王王懋招珍島餘黨之在耽羅者六月庚子朔日
有食之宋嘉定安撫使咎萬壽以城降賜名順癸卯
遣兩浙大都督范文虎持詔往諭安豐壽州招信五

河等處鎮戍官吏軍民遣刑部侍郎伯木諭朱禩孫
以年老多病不任朝謁權留大都無自疑懼諭廉希
憲等元沒青陽夢炎李湜家貲如籍還之併徙其家
赴都甲辰以萬戶阿剌罕爲行中書省叅知政事獲
知開州張章赦其罪章二子枉楫先來降以其子故
免死敕失里伯史樞率襄陽熟券軍二千獵戶丁壯
二千同范文虎招安豐軍各賜馬十匹其故嘗從丞
相史天澤者十九人願宣勞軍中令從樞以行戊申
簽平陽西京延安等路達魯花赤第男爲軍辛亥賞
諸王兀魯所部獲功建都者二千五人銀鈔有差定

兀魯衛士人各馬二疋從者一匹敕淮東元帥府發兵及鄂州戍兵與李壇舊部曲并前河南已簽軍萬人後免爲民者復籍爲兵並付行中書省戊午詔遣使招諭宋四川制置趙定應比者畢再興青陽夢炎赴闕面陳蜀關事宜奏請緩師令自納款姑從所請今遣再興宣布大信若能順時達變可保富貴毋爲塗炭生靈自貽後悔庚申遣重慶府招討使畢再興特詔招諭宋合州節度張珏江安潼川安撫張朝宗涪州觀察陽立梁山軍防禦馬壘辛酉宋潼川安撫使知江安州梅應春以城降乙丑以漣海新附丁順

等括船千艘送淮東都元帥府丙寅宋揚州都統姜才副將張林步騎二萬人乘夜攻揚子橋木柵守柵萬戶史弼來告急阿朮自瓜州以兵赴之詰旦至柵下才軍夾水爲陣阿朮麾騎兵渡水擊之陣堅不動阿朮軍引却才軍來逼我軍與力戰才軍遂走阿朮麾步騎並進大敗之才僅以身免生擒張林斬首萬八千級戊辰敕塔出率阿塔海也速帶兒兩軍赴漣水以遜攤爲羅國達魯花赤罷山東經畧司秋七朮月庚午朔阿朮集行省諸翼萬戶兵船于瓜州阿塔海董文炳集行院諸翼萬戶兵船于西津渡宋沿江

制置使趙潛樞密都承旨張世傑知泰州孫虎臣等
陳舟師于焦山南北阿朮分遣萬戶張弘範等以拔
都兵船千艘西掠珠金沙辛未阿朮阿塔海登南岸
石公山指授諸軍水軍萬戶劉琛循江南岸東趨夾
灘繞出敵後董文炳直抵焦山南麓以倚其右招討
使劉國傑趣其左萬戶忽刺出搏其中張弘範自上
流繼至趣焦山之北大戰自辰至午呼聲震天地乘
風似火箭射其鵞蓬宋師大敗世傑虎臣等皆遁走
追至圍山獲黃鵠白鷓船數百艘宋人自是不復能
軍翌日宋平江都統劉師勇殿帥張彥以兩浙制司

軍至呂城復爲阿塔海行院兵所敗壬申簽雲南落
落蒲納烘等處軍萬人隸行中書省癸亥太白犯井
詔取茶罕章未附種落丁丑立衛州至楊村水驛五
已卯增置燕南河北道提刑按察司以蔡州驛蒙古
軍四百隸阿里海牙漢軍六百從萬戶宋都帶赴江
西壬午遣使招宋淮安安撫使朱煥癸未詔遣使江
南搜訪儒醫僧道陰陽人等敕左丞相伯顏率諸將
直趨臨安右丞阿里海牙取湖南蒙古萬戶宋都帶
漢軍萬戶武秀張榮實李恒兵部尚書呂師夔行都
元帥府取江西罷淮西行樞密院以右丞阿塔海叅

政董文炳同署行中書省事辛卯太陰犯畢甲午遣使持詔招諭宋李庭芝及夏賞以伯顏爲中書右丞相阿朮爲中書左丞相八月己亥免北京西京陝西等路今歲絲銀癸卯伯顏辭南行奉詔諭宋君臣相率來附則趙氏族屬可保無虞宗廟悉許如故授故奉使大理王君候子如珪正八品官己未升任城縣爲濟州辛酉車駕至自上都丙寅高麗王王愷遣其樞密副使許珙將軍趙珪來賀聖誕節九月己巳太白犯少民庚午阿合馬等以軍興國用不足請復立都轉運司九量增課程元額鼓鑄鐵器官爲局賣

禁私造銅器乙亥賞清河新城戰士及死事者銀千兩鈔百錠賜西平王所部鴨城戍兵人馬三匹丁丑以襄陽官牛五千八百賜貧民弛河南鬻馬之禁賜東西川屯戍蒙古軍糧鈔有差戊寅諭太常卿合丹去冬享太宮敕牲無用牛今其復之己卯太白犯太微西垣上將壬午阿朮築灣頭堡乙酉罷襄陽統軍司甲午宋揚州都統姜才將步騎萬五千人攻灣頭堡阿朮阿塔海擊敗之賞淮安招討使乞里迷失及有功將士錦衣銀鈔有差丙申以玉昔帖木兒爲御史大夫括江南諸郡書叛及臨安秘書省乾坤寶典

等書冬十月戊戌朔享于太廟辛丑施北京義錦等處獵禁癸丑太陰犯畢十一月丁卯阿里海牙以軍攻潭州乙亥伯顏分軍爲三趨臨安阿剌罕率步騎自建康四安廣德以出獨松嶺董文炳率舟師循海趨許浦澈浦以至浙江伯顏阿塔海由中道節度諸軍期並會于臨安丙子宋權融宜欽三州總管岑從毅沿邊巡檢使廣西節制軍馬李維屏等詣雲南行中書省降丁丑阿合馬奏立諸路轉運司凡十一所已卯宋都帶等軍次隆興府宋江西轉運使知府劉槃以成降都元帥府檄諭江西諸郡相繼歸附得府

州六軍四縣五十六戶一百五萬一千八百二十九口二百七萬六千四百壬午伯顏大軍至常州督諸軍登城四面並進拔其城劉師勇變服單騎南走改順天府爲保定府樞密院言兩都平灤獵戶新簽軍二千皆貧無力者宜存恤其家又新附郡縣有旣降復叛及糾衆爲盜犯罪至死者旣已款伏乞聽權宜處決皆從之中書省臣議斷死罪詔今後殺人者死問罪狀已白不必待時宜卽行刑其奴婢殺主者具五刑論乙酉阿剌罕克廣德趣獨松關丙戌太陰犯軒轅大星巳丑遣太常卿合舟以所獲塗金爵三獻

于太廟庚寅伯顏遣降人游介實奉璽書副本使于宋仍以書諭宋大臣甲午以高麗國官制僭濫遣使諭旨凡省院臺部官名爵號與朝廷相類者改正之十二月戊戌填星犯亢巳亥僉書四川行樞密院事督順言紹慶府施州南平及諸蠻呂告馬蒙阿永等有嚮化之心又播州安撫楊邦憲思州安撫田景賢未知道逆順乞降詔使之自新並許世紹封爵從之辛丑董文炳軍次許浦宋都統制祁安以本軍降宋主爲書介國信副使嚴忠範姪煥請和甲辰伯顏次平江府宋都統王邦傑以城降乙巳免江陵等處今歲

田租丁未改諸站提領司爲通政院戊申中書右丞相忽都帶兒與内外文武百寮及緇黃耆庶請上黃帝尊號曰憲天述道仁文義武大光孝皇帝皇后曰貞懿順聖昭天睿文光應皇后不許太陰犯畢庚子宋主復遣尚書夏士林右史陸秀夫奉書稱姪乞和西川滄溪知縣趙龍遣間使入宋敕流遠方籍其家癸亥敕樞密院靖州旣降復叛今巳平定其遣張通判李信家屬并同叛者赴都甲子荅宋國王書令其來降丙寅阿剌罕軍次安吉州宋安撫使趙與可以城降升高麗東寧府爲路割江東南康路隸江西省

置馬朔路總管屯省重慶路隆化縣入南川灤州海
山縣入昌黎縣復華州鄖縣是歲衛輝太原等路旱
河間霖雨傷稼凡賑米三千七百四十八石粟二萬
四千二百六石天下戶四百七十六萬四千七十七
斷死罪六十八人

本紀卷第八

本紀卷第九

元史九

南京國子監祭酒侯恪

補修

業謝德溥

世祖六

十三年春正月丁卯朔克潭州宋安撫史李芾盡室
自焚死。阿里海牙分遣官屬招徠未附者旬日間湖
南州郡相繼悉降。得府一州六軍二縣四十戶五十
六萬一千一百一十二口百五十三萬七千七百四
十伯顏軍次嘉興府安撫劉漢傑以城降。董文炳軍
次乍浦宋統制官劉英以本軍降。辛未董文炳軍至

海塩知縣事王與賢及澉浦鎮統制胡全福建路馬步軍總管沈世隆皆降。壬申改都統領司爲通政院合元良合帶等領之立回易庫于諸路凡十有一掌市易幣帛諸物敕大都路總管府和顧和買權豪與民均輸。癸酉宋相陳宜中遣軍器監劉庭瑞賫宋主稱潘表章詣軍前稟議。又致宜中等書于伯顏。伯顏以書荅之。乙亥詔諭四川制置使趙定應來朝徙大都等路獵戶戍大洪山之東符寶郎董文忠請貧病者勿徙從之。宋復遣監察御史劉岳賫宋主稱潘表至軍前。且致書伯顏爲宗社生靈請命。丙子賞合兒

魯帶所部將士征建都功銀鈔錦衣丁丑宋遣都統洪模賫陳宜中吳堅等書請俟宗長福王至同詣軍前。戊寅伯顏以軍出嘉興府留萬戶忽都虎千戶王禿林察戍之。劉漢傑仍爲其府安撫使。辛巳命雲南行省給建都屯軍弓矢軍次崇德縣。宋遣侍郎劉庭瑞都統洪模來迂行都元帥府。宋都帶言江西隆興建昌府州等郡雖附而閩廣諸州尚阻兵乞增兵進討。敕以襄漢軍四千俾將之。壬軍軍次長安鎮董文炳以兵來會。宋陳宜中吳堅等違約不至。癸未軍次臨平鎮。甲申次高亭山。阿剌罕以兵來會。宋主遣其保康

軍承宣使尹甫和州防禦使吉甫等賁傳國王璽及降表詣軍前。其辭曰：大宋國王焜謹百拜奉表于大元仁明神武皇帝陛下。臣昨嘗遣侍郎柳岳正言洪雷震捧表馳詣闕庭，敬伸卑悃，伏計已徹。聖聽。臣眇焉幼冲，遭家多難。權奸似道，背盟誤國。臣不及知，至勤與師，問罪宗社，沾危。生靈可念。臣與太皇，日夕憂懼。非不欲遷，辟以求兩全。實以百萬生民之命，寄臣一身。今天命有歸，臣將焉往。惟是世傳之鎮寶，不敢愛惜。謹奉太皇命，戒痛自貶，損削帝號，以兩浙福建江東西湖南北二廣四川見在州郡，謹悉奉上聖朝。

爲宗社生靈，祈哀請命。欲望聖慈，垂哀。祖母太后，及臥病數載，臣營營在疚，情有足矜。不忍臣祖宗三百年宗社，遽至殞絕。曲賜裁處，特與存全。大元皇帝再生之德，則趙氏子孫，世世有賴。不敢弭忘。臣無任感天望聖，激切屏營之至。伯顏旣受降表，玉璽復遣囊加帶以趙尹甫賈餘慶等還臨安。召宰相出議降事。乙酉，師次臨安北十五里。囊加帶洪模以總管殷俊來報，宋陳宜中張世傑蘇劉義劉師勇等挾益廣二王出嘉會門，渡淞江遁去。惟太皇太后嗣君在宮。伯顏亟使諭阿剌罕董文炳范文虎率諸軍先據守。

錢塘口以勁兵五千人追陳宜中等過淞江不及而還丙戌伯顏下令禁軍士入城違者以軍法從事遣呂文煥賫黃榜安諭臨安中外軍民俾按堵如故時宋三司衛兵白晝殺人張世傑部曲尤橫閭里小民乘時剽殺令下民大悅伯顏又遣宣撫程鵬飛計議孫鼎亨囊加帶洪君祥入宮安諭太皇謝氏丁亥雲南行省賽典赤以改定雲南諸路名號來上又言雲南貿易與中州不同鈔法實所未諳莫若以交會賦子公私通行庶爲民便並從之戊子中書省臣言王承忠等以罪命往八命山採寶玉自劾道經沙州值

火忽叛孝忠等自拔來歸令於瓜沙等處屯田從之大名路達魯花赤小鈐部坐姦職伏誅沒其家宋王祖母謝氏遣其丞相吳堅文天祥樞密謝堂安撫賈餘慶中貴鄧惟善來見伯顏於明因寺伯顏顧文天祥舉動不常疑有異志遂令萬戶忙古帶宣撫唆都羈留軍中且以其降表不稱臣仍書宋號遣程鵬飛洪君祥偕來使賈餘慶復往易之已丑軍次湖州市遣千戶囊加帶省掾王祐賫傳國王璽赴闕敕高麗國以有官子弟爲質中書省臣言賦民舊籍已有定額至元七年新括協濟合併戶爲數凡二十萬五千

一百八十敕滅今歲絲賦之半庚寅伯顏建大將旗鼓率左右翼萬戶巡臨安城觀潮淞江於是宋宗室大臣以次來見暮還湖州市辛卯張弘範孟祺程鵬飛賚所易宋主稱臣降表至軍前甲午復薊州平谷縣立隨路都轉運司仍詔諭諸處管民官以龔吉刺帶丑漢所部軍五百戍哈答城不吉帶所部軍六百移戍建都其元兒秃唐忽軍前在建都者並遣還翼穿濟州漕渠以真定總管昔班爲中書右丞二月丁酉詔劉頴程德輝招淮西制置使夏貴已亥克臨江軍庚子宋主焜率文武百僚詣祥曦殿望闕上表乞

爲藩輔遣右丞相兼樞密使賈餘慶樞密使謝堂端明殿學士簽樞密院事家鉉翁端明殿學士同簽樞密院事劉岳奉表以聞宋主祖母太皇太后亦奉表及牋是日宋文武百司出臨安府詣行中書省各以其職來見行省承制以臨安爲兩浙大都督府都督忙古帶范文虎入城視事辛丑伯顏令張惠阿剌罕董文炳左右司官石天麟楊晦等入城取軍民錢穀之數閱莫倉庫收百官誥命符印悉罷宋官府散免侍衛禁軍宋主焜遣其右丞相賈餘慶等克祈請使詣闕請命右丞相命吳堅文天祥同行行中書省右

丞相伯顏等以宋主焘舉國內附具表稱賀兩湖路得府八州六軍一縣八十一戶二百九十八萬三千六百七十一口五百六十九萬二千六百五十丁未詔諭臨安新附府州司縣官吏士民軍卒人等曰間者行中書省右丞相伯顏遣使來奏宋母后幼主暨諸大臣百官已於正月十八日賫璽綬奉表降附朕惟自古降王必有朝覲之禮已遣使特往迎致爾等各守職業其勿妄生疑畏凡歸附前犯罪悉從原免公私逋欠不得徵理應抗拒王師及逃亡嘯聚者並赦其罪百官有司諸王邸第三學寺監祕省史館及

禁衛諸司各宜安居所在山林河泊除巨木花果外餘物權免徵稅祕書省圖書太常寺祭器樂器法服樂工鹵簿儀衛宗正譜牒天文地理圖冊凡典故文字并戶口版籍盡仰收拾前代聖賢之後高尚儒醫僧道卜筮通曉天文曆數並山林隱逸名士仰所在官司具以名聞名山大川寺觀廟宇並前代名人遺迹不許拆毀鰥寡孤獨不能自存之人量加贍給伯顏就遣宋內行王埜入宮收宋國袞寃圭璧苻璽及宮中圖籍寶玩車輅輦乘鹵簿麾仗等物戊申立泐東西宣慰司於臨安以戶部尚書麥歸祕書監焦友

直爲宣慰使。吏部侍郎楊居寬同知宣慰司事。並兼知臨安府事。乙卯詔諭淮東制置使李庭芝。淮西制置使夏貴。及所轄州軍縣鎮官吏軍民。丁巳命焦友直括宋祕書省禁書圖籍。戊午祀先農東郊。淮西制置夏貴以淮西諸郡來降。唯鎮巢軍復叛。貴遣使招之。守將洪福殺其使。貴親至城下。福始降。阿木斬之。軍中淮西路得府二州六軍四縣三十四戶五十一萬二千八百二十七口一百二萬一千三百四十九。庚申召伯顏偕宋君臣入朝。辛酉車駕幸上都。設資戒大會于順德府開元寺。伯顏遣不伯周青招泉州

蒲壽庚壽晟兄弟。甲子董文炳唆都發宋隨朝文士。劉褒然及三學諸生赴京師。太學生徐應鑣父子四人同赴井死。帝旣平宋。召宋諸將問曰。爾等何降之。易耶。對曰。宋有強臣賈似道。擅國柄。每優禮文士。而獨輕武官。臣等久積不平。心離體解。所以望風而送歎也。帝命董文忠答之曰。借使似道實輕汝曹。特似道一人之過耳。且汝等何負焉。正如所言。則似道之輕汝也。固宜。二月丁卯命樞密副史張易兼知祕書監事。伯顏入臨安。遣郎中孟祺籍宋太廟四祖殿景監官禮樂器冊寶暨郊天儀仗及祕書省國子監副

吏院學士院太常寺圖書祭器樂器等物戊辰括江南已附州郡軍器甲戌阿朮遣使報廬州夏貴已降文天祥自鎮江遁去追之弗獲荆湖南路行中書省言潭州既定湖南州郡降者相繼卽分命諸將鎮守其地從之宋福王與芮自浙東至伯顏軍中以獨松關守將張濡嘗殺奉使廉希賢斬之籍其家乙亥伯顏等發臨安丁丑阿塔海阿剌罕董文炳詣宋主宮趣宋主焜同太后入覲郎中孟祺奉詔宣讀至免繫頸牽羊之語太后全氏聞之泣謂宋主焜曰荷天子聖慈活汝當望闕拜謝宋主焜拜畢子母皆天輿出

宮唯太皇太后謝氏以疾留戊寅敕諸路儒戶通文學者二千八百九十並免其徭役其富貴以儒戶避役者爲民貧乏者五百戶隸太常寺救淮西廬州置總管萬戶府以中書右丞河南等路宣慰使合剌合孫襄陽管軍萬戶邱浹並行府事庚辰囊加帶以宋玉璽來上乙酉贛吉袁南安四郡內附庚寅賜郡王瓜都銀印敕上都和顧和買並依大都例以中書右丞昔班爲戶部尚書閏月丙申置宣慰司於濟寧路掌印造交鈔供給江南軍儲以前西夏中興簽行中書省事閻都剌卽思大都路總管張守智並爲宣慰

使東川行樞密院總帥汪惟正略地涪州克山寨谿洞凡二十有三所丁酉召湖廣阿里海牙忽都帖木兒赴關令脫撥忽魯禿花崔賦並留後鄂州辛亥命副樞張易遣宋降臣吳堅夏貴等赴上都戊午淮西萬戶府招降方山等六寨甲子禁西番僧持軍器以中書省左右司郎中郝禎叅知政事夏四月乙丑朔阿木以宋高郵寶應嘗餽餉揚州遣蒙古軍將苦徹及史弼等守之別遣都元帥孛魯歡等攻秦州之新城丁卯賜諸生都魯金印戊辰以河南兵事未息開元路民饑並弛正月五月屠殺之禁庚午敕南商貿

易京師者毋禁辛未行江西都元帥宋都帶以應詔儒生醫卜士鄭夢得等六人進敕隸祕書監丙子省東川行樞密院及成都經略司以其事入西川行院復石人山寨居民于信陽軍免大都醫戶至元十二年絲銀已卯以侍衛親軍征戊歲久放令還家期六月各歸其軍庚辰以水達達分地歲輸皮革自今並入上都壬午召嗣漢天師張宗演赴闕乙酉召招丈館大學士姚樞翰林學士王磐翰林侍講學士徒單公履赴上都庚辰修太廟以北京行中書省廉希憲為中書右丞行中書省事于荆南府五月乙未朔伯

顏以宋主熈至上都制授熈開府儀同三司檢校大司徒封瀛國公以平宋遣官告天地祖宗於上都之近郊遣使代祀嶽瀆己亥伯顏請罷兩浙宣慰司以忙古帶范文虎仍行兩浙大都督府事從之庚子定度量壬寅宋三學生四十六人至京師癸卯復沂莒膠密寧海五州所括民爲防城軍者爲民免其租徭二年乙巳賜伯顏所部有功將校銀二萬四千六百兩阿朮遣總管陳傑攻拔泰州之新城遣萬戶烏馬兒守之以偪泰州下未宋揚州都統姜才攻灣頭堡阿里別擊走之殺其步騎四百人右衛親軍千戶董

士元戰死戊申宋馮都統等自真州率兵二千戰船百艘襲瓜州阿朮遣萬戶昔里罕阿塔赤等出戰大敗之追至珠金沙得船七十七艘馮都統等赴水死改博州爲東昌路己酉括獵戶鷹坊戶爲兵乙卯靖州張州判及李信李發焚其城退保飛山新城行中書省發兵攻殺之徒其黨及家屬于大都宋江西制置黃萬石率其軍來附敕令人覲辛酉安西王相府請頒詔招合州張珏不從癸亥陞異樣局爲總管府秩三品六月甲子朔敕新附三衛兵之老弱者放還其家己巳以孔子五十三世孫曲阜縣尹孔治兼權

主祀事命東征元帥府選襄陽主券軍五百克侍衛
軍置行戶部于大名府掌印造交鈔通江南貿易庚
午敕西京僧道也里可溫荅失蠻等有室家者與民
一體輸賦辛未命阿里海牙出征廣西請益兵選軍
三萬俾將之壬申罷兩浙大都督府立行尚書省於
鄂州臨安設諸路宣慰司以行省官爲之並帶相銜
其立行省者不立宣慰司甲戌以大明曆浸差命太
子贊善王恂與江南日官置局更造新曆以樞密
副使張易董其事易恂奏今之曆家徒知曆術罕明
曆理宜得耆儒如許衡省商訂詔衡赴京師宋揚州

姜才夜率步騎數千趨丁村堡守將史弼苦徹出戰
斬首百餘級獲馬四十疋詰旦阿里都督陳巖以灣
頭堡兵邀其後伯顏察兒踵至所將皆阿木麾下兵
姜才軍遙望旗幟亟走遂大破之獲米五千餘石阿
木又以宋人高郵水路不通必由陸路餽運千戶也
先忽都以千騎邀之數日米運果來殺負米卒數千
獲米三千石戊寅詔作平金平宋錄及諸國臣服傳
記仍命平章軍國重事耶律鑄監修國史戊子樞密
院上言陳宜中張世傑聚兵福建以攻我師江西都
元帥宋都帶求援命以安慶蘄黃等郡宿兵付宋都

帶將之。己丑宋都帶言福建魏天祐游義榮棄家來附。以天祐爲管軍總管兼知邵武軍事。義榮遙授建寧路同知充管軍千戶。壬辰王詔招諭宋揚州制置李庭芝以次軍官及通泰真滁高郵大小官員。又詔諭陳宜中張世傑蘇劉義劉師勇等使降。李庭芝留朱煥守揚州與姜才率步騎五千東走阿木親率百徐騎馳去督右丞阿里萬戶劉國傑分道追及泰州西殺步卒千人。庭芝等僅得入遂築長圍塹而守之。阿木獨當東南面斷其走路以戶部尚書張澍叅知政事行中書省事于北京。秋七月乙未行中書省左

右司郎中孟祺以亡宋金玉寶及牌印來上命太府監收之。丙申淮安寶應民流寓邳州者萬餘口聽還其家。丁酉宋涪州觀察陽立子嗣榮請降詔招諭其父從之。戊戌陞閩州爲保寧府。敕山丹城直隸省部以達魯花赤行者仍領之。壬寅以李庭出征賞其部將李承慶等鈔馬衣服甲仗有差。乙巳朱煥以揚州降。丁未詔諭廣西路靜江府等大小州城官吏使降。甲寅賜諸王孛羅印以揚村至浮雞泊漕渠洄遠改從孫家務。乙卯宋泰州守將孫良臣與李庭芝帳下卒劉發鄭俊開北門以降執李庭芝姜才繫揚州獄。

丙辰阿木以總管烏馬兒等守泰州其通滁高郵等處相繼來附淮東路得州十六縣三十三戶五十四萬二千六百二十四口一百八萬三千二百一十七遣使持香幣祠嶽瀆后土以中書右丞阿里海牙爲平章政事簽書樞密院事淮東行樞密院別乞里迷失爲中書右丞叅知政事董文炳爲中書左丞淮東左副都元帥塔出兩湖大都督范文虎江東江西大都督知江州呂師夔淮東淮西左副都元帥陳巖並叅知政事八月己巳穿武清蒙村漕渠救漢軍都元帥濶濶帶李庭將侍衛軍二千人西征陞溧陰縣爲

溧州乙亥斬宋淮東制置使李庭芝都統姜才于揚州市庚辰罷襄陽統軍司車駕至自上都遣太常卿忽脫思以銅爵一豆二獻于太廟以四萬戶總管與魯赤叅知政事九月壬辰朔命國師益憐真作佛事于太廟己亥享于太廟常饌外益野豕鹿羊蒲萄酒庚子命姚樞王磐選宋三學生之有實學者留京師餘聽還家辛丑遣瀘州屯田軍四千轉漕重慶癸卯以平宋赦天下乙巳高麗國王王懌上叅議中讚金方慶功授虎符丙午敕常德府歲貢包茅丁未諭西川行樞密院移檄重慶俾內附命有司隳泐淮城壘

辛亥太白犯南斗甲寅太白入南斗乙卯以吐蕃合
荅城爲寧遠府辛酉召宋宗臣鄂州教授趙與票赴
闕設資戒會于京師阿木入覲江淮及浙東西湖南
北等路得府三十七州一百二十八關一監一縣七
百三十三戶九百三十七萬四百七十二口千九百
七十二萬一千一十五冬十月甲子以陳巖拔新城
丁村功賜金五十兩部將劉忠等賜銀有差乙亥賜
皇子北平王出征軍士貧乏者羊馬幣帛有差申明
以良爲娼之禁丁亥兩浙宣撫使焦友直以臨安經
籍圖書陰陽秘書來上戊子淮西安撫使夏貴請入

覲乞令其孫貽孫權領宣撫司事從之以淮東左副
都元帥阿里爲平章政事河南等路宣慰使合剌合
孫爲中書右丞兵部尚書王儀吏部尚書兼臨安府
安撫使楊鎮河南河北道提刑按察使迷里忽辛并
叅知政事叅知政事陳巖行中書省事于淮東十一
月癸巳安西王所部軍克萬州丙午賜阿木所部有
功將士二百三十九人各銀二百五十兩西川行院
忽敦言所部軍士久圍重慶逃亾者衆乞益軍一萬
并降詔招誘逋民之在大良平者併從之壬子賜龍
荅溫軍有功及死士者銀鈔有差癸丑併省內外諸

司丁卯太陰犯填星庚申救管民及理財之官由中書
銓調軍官由樞密院定議隕襄漢荆湖諸城南平招
撫使兼知峽州事趙真請降詔招諭夔州安撫張起
巖從之高麗國王王懌遣其臣判祕書寺朱悅來告
更名睦十二月辛卯朔熒惑掩鈞鈐以十四年曆日
賜高麗丁卯改雲南蘿蔔甸爲元江府路辛未賜塔
海所部戰士及死事者銀鈔有差賜忽不來等戰功
十九人銀千二百兩壬申李思敬告運使姜毅所言
悖妄指毅妻子爲證帝曰妻子豈爲證者耶詔勿問
乙亥定江南所設官府辛巳以軍士圍守崇慶勞苦

賜鈔六千錠庚寅詔諭瀾東西江東西淮東西湖南
北府州軍縣官吏軍民昔以萬戶千戶漁奪其民致
令逃散今悉以人民歸之元籍州縣凡管軍將校及
宋官吏有以勢力奪民田廬產業者俾各歸其主無
主則以給附近人民之無生產者其田租商稅茶鹽
酒醋金銀鐵冶竹貨湖泊課程從實辦之凡故宋繁
冗科差聖節上供經總制錢等百有餘件悉除免之
伯顏言張惠守宋府庫不俟命擅啓管鑰詔阿木詰
其事仍諭江之東西瀾之東西淮之東西官吏等檢
覈新舊錢穀除瀾西瀾東江西江東湖北五道宣慰

使陞江陵爲上路瑞安府仍爲温州隴州爲散府蘄州復置豐閏縣陞臨洮渭源堡爲孫賜諸王金銀幣帛如歲例賜諸王乃蠻帶等羊馬價賞阿朮等戰功及賜降臣吳堅夏貴等銀鈔幣帛各有差賜伯顏阿朮等青鼠銀鼠黃狃只孫衣餘功臣賜豹裘犴裘及皮衣帽各有差是歲東平濟南泰安德州漣海清河平灤西京西三州以水旱缺食賑軍民站戶米二十萬五千五百六十石粟四萬七千七百一十石鈔四千二百八十二錠有奇平陽路旱濟寧路及高麗潘州水並免今年田租斷死罪二十四人東西

十四年春正月癸巳行都元帥府軍次廣東知循州劉興以城降丙申以江南平百姓疲於供軍免諸路今歲所納絲銀賜嗣漢天師張宗演演道靈應冲和真人領江南諸路道教戊戌高麗金方慶等爲亂命高麗王治之仍命忻都洪茶丘飭兵禦備癸卯復立諸道提刑按察司甲辰命阿朮選銳軍萬人赴闕丁未知梅州錢榮之以城降戊申賜三衛軍士之貧乏者八千三百五十二人各鈔二錠幣十匹己酉賜耶律鑄鈔千錠甲寅敕宋福王趙與芮家貲之在杭越者有司輦至京師付其家丙辰立建都羅羅斯四路

守戍烏木等處並置官屬己未以白玉碧玉水晶爵
六獻于太廟括上都隆興北京西京四路獵戶二千
爲兵置江淮等路都轉運鹽使司及江淮榷茶都轉
運使司命嗣漢天師張宗演修周天醮于長春宮宗
演還江南以其弟子張留孫留京師二月辛酉命征
東都元帥洪茶丘將兵二千赴上都壬戌瑞州安撫
姚文龍率張文顯來降其家屬爲宋人所害賜文龍
文顯等鈔有差癸亥彗星出東北長四尺餘甲子遣
使代祀嶽瀆后土丙寅改安西王傳銅印爲銀印立
永昌路山丹城等驛仍給鈔千錠爲本俾取息以給

驛傳之須諸王只必鐵木兒言永昌路驛百三十五
疲於供給質妻孥以應役詔賜鈔百八十錠贖還之
丁卯荆湖北道宣慰使塔海拔歸州山寨四十七所
戊辰祀先農東郊甲戌西川行院不花率衆數萬至
重慶營浮屠關造梯衝將攻之其夜都統趙安以城
降張珏艤船江中與其妻妾順流走涪州元帥張德
潤以舟師邀之珏遂降車駕幸士都幸己命北京選
福住所統軍三百赴上都壬申隰吉府二州城隆興
濱西江姑存之仍選汀州軍馬守禦瑞金縣丙戌連
州守過元龍已降復叛塔海將兵討之元龍棄城遁

丁亥知南恩州陳堯道僉判林叔虎以城降詔以僧
亢吉祥伶真加加瓦並爲江南總攝掌釋教除僧租
賦禁擾寺宇者以大司農御史大夫宣徽使兼領侍
儀司事孛羅爲樞密副使兼宣徽使領侍儀司事三
月庚寅朔以冬無雨雪春澤未繼遣使問便民之事
於翰林國史院耶律鑄姚樞王磐竇默等對曰足食
之道唯節浮費靡穀之多無踰醪醴麩藁况自周漢
以來嘗有明禁祈賽神社費亦不貲宜一切禁止從
之辛卯湖廣行中書省言廣西二十四郡並已內附
儀復行中書省于潭州置廣南西路宣府司於靜江

詔鄭鼎所將侍衛軍萬人遠京師崔賦阿里海牙同
駐靜江忽都鐵木兒鄭鼎同駐鄂漢賈居貞脫博忽
魯禿花同駐潭州癸巳以行都水監兼行漕運司事
甲午以鄭鼎所部軍士府定靜江之勞命還家少休
期六月赴上都乙未福建漳泉二郡蒲壽庚印德傳
李珣李公度皆以城降丁酉括馬三萬二千二百六
匹孕駒者還其主壬寅廣東肇慶府新封等州皆來
降癸卯壽昌府張之綱以從叛棄市乙巳命中外軍
民官所佩金銀符以色組繫于肩腋庶無褻瀆具爲
令庚戌建寧府通判郭纘以城降黃州歸附官史勝

入覲以所部將校于躍等三十一人戰功聞命官之
僉書東西川行樞密院事咎順言北遣同知隆州事
趙孟煇賚詔招諭南平軍都掌蠻羅計蠻及鳳凰中
壠羅韋高崖等四砦皆降田楊二家豕鴆夷民亦各
遣使納款壬子實應軍人施福殺其守將降于淮東
都元帥府詔以福爲千戶佩金符癸丑命汪惟正自
東川移鎮鞏昌行中書省承制以閩浙溫處台福泉
汀漳劍建寧邵武興化等郡降官各治其郡潭州行
省遣使上言廣南西路慶遠鬱林昭賀藤梧融賓柳
象邕廉容貴潯皆降得府一州十四復立襄陽府襄

陽縣平章政事浙西道宣慰使阿塔海爲平章政事
行中書省事於江淮郡王合荅爲平章政事行中書
省事於北京夏四月甲子宋特磨道將軍農士貴知
安平州李惟屏知來安州岑從毅等以所屬州縣溪
洞百四十七戶二十五萬六千來附癸酉省各路轉
運司事入摠管府設鹽轉運司四置榷場於碣門黎
州與吐蕃貿易丙子召安府趙與可宣府陳巖入覲
丙戌禁江南行用一錢均州復立南漳縣五月癸巳
申嚴大都酒禁犯都籍其家貲散之貧民辛丑千戶
合刺合孫死於渾都海之戰命其子忽都帶兒襲職

癸卯改廣南西路宣府司為宣慰司廣西欽橫二州
改立安府司各道提刑按察司兼勸農事敕江南歸
附官三品以上者遣質子一人入侍西番長阿立丁
甯古等三十一族來附得戶四萬七百丙子融州安
府使譚昌謀為不軌伏誅辛亥以河南山東水旱除
河泊課聽民自漁乙卯選蒙古漢軍相參宿衛詔諭
思州安府使田景賢又詔諭瀘州西南番蠻王阿永
筠連騰串等處諸族蠻夷使其來附命真人李德一
代祀濟瀆六月丙寅涪州安府陽立及其子嗣榮相
繼來附命立為夔路安府使嗣榮為管軍總管並一

虎符仍賜鈔百錠壬寅賞征廣戰死之家銀各五十
兩丁丑置尚膳院秩三品以提點尚食尚藥局忽林
失為尚膳使其屬司有七庚辰賞陽立所部戰士鈔
千錠甲申荆湖北道宣慰使黑的得謀者言夔府將
出兵攻荆南諭陽立等與塔海會兵禦之丁亥陞崇
明沙為崇明州以行省參政行江東道宣慰使阿刺
罕為中書左丞行江東道宣慰使湖北道宣慰使與
魯赤參知政事行湖北道宣慰使秋七月戊子朔罷大
名濟寧印鈔局壬辰敕犯盜者皆棄市符寶郎董文
忠言盜有強竊賊有多寡似難悉寘于法帝然其言

遽命止之丁酉敕自今非佩符使臣及軍情急速不聽乘傳戊戌申禁羊馬群之在北者八月內毋縱出北口諸隘踐食京畿之禾犯者沒其畜癸卯諸王昔里吉劫北平王于力麻里之地械繫右丞相安童誘脅諸王以叛使邇好于海都海都弗納東道諸王亦弗從遂率西道諸王至和林城北詔右丞相伯顏帥軍往禦之諸王忽魯帶率其屬來歸與右丞相伯顏等軍合丙午置行御史臺於揚州以都元帥相威為御史大夫置八道提刑按察司戊申東川都元帥張德潤等攻取涪州大敗之擒安府程聰陳廣置行

中書省于江西以參知政事行江西宣慰使塔出為右丞各知政事行江西宣慰使麥木丁為左丞淮東宣慰使徹里帖木兒江東宣慰使張榮實江西宣慰使李恒招討使也的迷失萬戶昔里門荆湖路宣府使程鵬飛閩廣大都督兵馬招討使蒲壽庚並參知政事行江西省事壬子權大都商稅丁巳湖北宣慰司調兵攻司空山復壽昌黃州二郡賜平宋將帥軍士及簡州軍士廣西死事者銀鈔各有差回水窩淵聖廣源王加封善佑常山靈濟昭應王加封廣惠安丘霄泉靈霈侯追封靈霈公以參知政事行江東道

宣慰使呂文煥爲中書左丞八月戊午朔詔不花行院西川丁卯成都路倉收羨餘五千石按察司已治其罪命以其米就給西川兵辛未常德府總管魯希文與李三俊結構爲亂事覺命行省誅之車駕畋于上都之北九月壬辰製鑄鐵海青圓符丙申廣東南路廣連韶德慶會潮南雄英德等郡皆內附申辰福建行省以宋二王在其疆境調都督仁兀帶招討高典領兵討之昂吉兒忻都唐兀帶等引兵攻司空山寨破之殺張德興執其三子以歸壬子福建路宣慰使行征南都元帥唆都遣招討使百家奴丁廣取建

寧之崇安等縣及南劔州冬十月丙辰朔日有食之巳未享于太廟庚申湖北宣慰使塔海略地至夔府之太原坪禽其將誅之辛酉弛蓋州獵禁乙亥以宋張世傑文天祥猶未降命阿塔海選銳兵防遏隆興諸城禁無籍軍隨大軍剽掠者勿過關渡巳卯降臣郭曉魏象祖入覲賜幣帛有差壬午置宣慰司于黃州甲申播州安撫使楊邦憲言本族自唐至宋世守此土將五百年昨奉旨許令仍舊乞降璽書從之以行省參政忽都帖木兒脫傅忽魯禿花崔賦並爲中書左丞鄂州總管府達魯花赤張鼎湖北道宣慰使

賈居貞並參知政事十一月戊子樞密院臣言宋文天祥與其徒趙孟潛同起兵行中書發兵攻之殺孟潛天祥僅以身免詔以其妻孥赴京師右副都元帥張德潤上涪州功賜鈔千錠乙未凡偽造寶鈔同情者並處死分用者減死杖之具爲令庚子命中書省檄諭中外江南旣平宋宜日亡宋行在宜日杭州以吏部尚書別都魯丕參知政事十二月丙辰置中灤唐村淇門驛丁卯以大都物價翔踴發官廩萬石賑糶貧民庚午梁山軍袁世安以其城及金石城軍民來降壬申潭州行省復攸陽縣斬首賊羅飛餘黨悉

平乙亥都元帥楊文安攻咸淳府克之以十五年曆日賜高麗國以叅議中書省事耿仁叅知政事冠州及永年縣水免今年田租導任河復民田三千餘頃賜諸王金銀幣帛等物如歲例賜諸王也不干燕帖木兒等五百二十九人羊馬價鈔八千四百五十二錠賞拜荅兒等千三百五十五人戰功金百兩銀萬五千一百兩鈔百三十錠及納失失金素幣帛貂鼠豹裘衣帽有差是歲賑東平濟南等郡饑民米二萬一千六百十七石粟二萬八千六百十三石鈔萬一百十二錠斷死罪三十二人

百十二... 一千六百... 正千一百... 本紀卷第九



